



Nancy
Hanks
Lincoln
Public
Library





P

UNIV
OF
MICH

1811

KA MOOLELO

O

HENERI OPUKAHAIA,

UA HANAUIA MA HAWAII, M. H. 1787,

A

UA MAKE MA AMERIKA,

FEBERUARI 17, 1818.


OIA KA HUA MUA O HAWAII NEL.



PAIIA E

KO AMERIKA AHAHUI TERAKA,
NU IOKA.

1867.



OLELO HOAKAKA.

O KA nui o keia Moololo, ua unuhiia noloko mai o kekahi buke i paiia ma ka olelo Haole, ma Amerika Huipuia. Ua huli hou ia nae, a ua hooponoponoia kekahi mau hemahema o ua buke nei. O kekahi mau mea hoi, ua hookomo hou ia, no ka moololo a Rev. S. W. Papaula i imi ai ma Kealakekua, Hawaii.

He mea nui no kakou o Hawaii nei keia moololo o Heneri Opukahaiia; no ka mea, o ka makamua ia o na hana kupaianaha a ke Akua i hana lokomaikai mai ai i ko kakou Lahui nei; a no loko mai o ia hoomaka ana i mahuahua mai ai ka malamalama, ka naanao, a me ka pono ma Hawaii nei, a hiki wale i keia manawa.

Ina e lilo keia wahi moololo i mea e mahuahua'i ko kakou aloha i ka Haku, a me ko kakou hoonani ana ia Iehova, ua lawa iho la.

PAPA KUHIKUHI.

MOKUNA I.

KONA WAHI MOOLELO MAMUA O KONA HIKI ANA I AMERIKA—
Ka hanau ana—ke kua—make kona mau makua i ka
pepehiia—lawepioia—pakele a noho pu me kekahi ma-
kua ona—holo i Amerika—ku ka moku ma Kina—Nepe-
tune—ku ma Nu Ioka----- 7

MOKUNA II.

KONA HIKI ANA I AMERIKA A NOHO OIA MA NU HAVENA, A
MA TORINIFODA—Pae ma Nu Ioka—noho ma Nu Have-
na—aoia e Mr. Duaita—hiki ole ke puana i kekahi hua—
halawai mua me Mr. Mila—noho pu me Mr. Mila ma
Torinifoda—mahiai—aoia i ke kakaulima----- 27

MOKUNA III.

KONA NOHO ANA MA ANEDOVERA—Hiki aku i Anedovera—
ka pule mua ana—hele i ke kulanui ma Barapoda—hoi
hou i Anedovera—loaa ka manao mihi—halawai me ke-
kahi hoa Hawaii—noho me Mr. Abota—he mau leta—
noho ma Holisa----- 41

MOKUNA IV.

KA MIHI ANA IA KRISTO IMUA O KA LEHULEHU—HOOKAAWA-
LEIA NO KA HANA MISIONARI—Noho ma Litepila—lilo i
haumana o kekahi Ahakahuna—noho me Mr. Hareve
ma Gosena—komo i ka Ekalesia ma Torinifoda—lilo
malalo o ka Ahahui misionari ma Bosetona----- 58

MOKUNA V.

KONA HOOMAKAUKAU ANA NO KA OIHANA MISIONARI—Haalele ia Gosenā—noho me Mr. Perenetike ma Kanaana—lilo i hoahēle no Rev. Mr. Perekina—kaahēle laua e paipai i na ekalesia e kokua misionari—manao mahalo o Mr. Perekina—noho ma ke Kula misionari ma Konewelee—hoomakaukau no ka oihana haiolelo—loaa ka mai a make iho la----- 68

MOKUNA VI.

NA LA HOPE O KONA OLA ANA A ME KONA MAKE ANA—Ka olelo a Mrs. Stone no ko laua kamailio ana—lana ka manao iloko o ka pilikia o ka mai—kona mau hoa Hawaii—nui ke aloha ia lakou—kona manao hope loa ia lakou, me ka lulu lima—aloha i na makamaka, a make lanakila no—kona ano kino a me kona ano noonoo—he wahi mau leta ana i kakau ai ----- 79

MOKUNA VII.

HE MAU MANAO HOPE—Kupaianaha ka ke Akua hana ana—aole hoopaaia ko ke Akua lokomaikai—ola na mea a pau i lohe i ka Euanelio a manaoio—lokomaikai ke Akua i kona hoomakaukau ana i alanui e hiki aku ai ka Euanelio ma Hawaii nei i ola keia lahui ----- 95

KA MOOLELO

o

HENERI OPUKAHAIA.

MOKUNA I.

KONA WAHI MOOLELO MAMUA O KONA HIKI
ANA I AMERIKA.

O Keau ka makuakane, o Kamohoula ka makuahine. Hanau mai la na laua keia keiki, o Opukahaia, a me kekahi keiki e iho, kona muli mai, (aole i loa ka inoa o ia keiki.)

Ua hanau o Opukahaia i ka makahiki 1787, ma Kau, i Ninole, ma ka Mokupuni o Hawaii.

Ua kapaia kona inoa mamuli o ke kahaia ana o ka opu o kekahi alii; nolaila i kapaia ai o Opu-kahaia.

A hiki mai la ka wa o ke kaua ana o Ka-

mehameha me Namakeha, oia ke kauhā o Kaipalaoa i make ai o Namakeha, i ka makahiki 1797, o na makua o Opukahāia ka i make pu iloko o ia kauhā ana, a me kahi kaikaina uuku a Opukahāia, a pakele mahunehune wale oia nei. Ua aneane umi na makahiki o Opukahāia i kela manawa. Penei kahi moolelo a Opukahāia no ia mea.

“Elua aoao i hoopaapaa no ka mana Aupuni o ia aina.” (Oia paha o ko Kamehameha a me ko Namakeha.) “Hoouka ia ke kauhā, a weliweli loa ka luku ana. Hoopioia ka aoao nona ka makuakane o Opukahāia, a auhee nui aku. I ka lanakila ana mai o ko lakou mau enemi, lukuia no hoi ko laila mau kauhāle. Eia nae, ua kukala e ia ka hoea lanakila ana mai o ko lakou poe enemi. Nolaila, hopu iho la ka makuakane i kana wahine, a me na keiki elua a laua, a holo aku la i ke kuahiwi. Malaila lakou i pee ai i kekahi mau la, iloko o kekahi ana. Aka, no ka nui loa o ko lakou pilikia i ka makewai, puka mai la lakou i kekahi la ae e imi i ka wai e inu. Loaa ia lakou kekahi wai mapuna e kokoke ana ilaila, a oiai lakou e inu ana,

hoea hikilele mai la ka enemi. Ia manawa, ua holo koke ka makuakane, no ka pihoihoi o ka manao. Aka, ia ia e holo ana, uwe aku la kana wahine a me na keiki, a no kona aloha ia lakou, hoi mai la oia e kokua ia lakou. A i kona hookokoke ana mai ia lakou, ike ae la oia i ka enemi, ua kokoke loa mai, holo hou aku la oia. Ike ae la ka enemi i ka nui o kona aloha i kona ohana, hopu iho la lakou i kana wahine a me na keiki, a hooehaeha aku la ia lakou, i mea e hoea hou mai ai ka makuakane i loa aku lakou ia ia. A ua ko no ko lakou manao. No ka mea, i kona lohe ana i ka uwe kumakena ana o kona ohana iloko o na lima menemene ole o ka enemi, aole hiki ia ia ke hoomanawanui hou aku. Hoi hou mai la no ia, a o ko lakou hopu no ia ia ia a pepehi pu ia ia me kana wahine. Ia manawa nae, lalau ae la o Opukahaia i kona wahi pokii a waha iho la, hoao ae la e holo aku i pakele. Aka, ua alualu koke ia a loa, a make koke ae la kahi pokii i ka houia e ka pahua. A o ua o Opukahaia nei, ua hoolaila nae, no ka mea, ua ike lakou, aole ia i opiopio loa, e luhi wale ai lakou i ka malama ana, aole hoi i kanaka makuā ae, e makau aku ai lakou ia ia.”

Nolaila, ua lilo o Opukahaiia, ia manawa, i pio iloko o ka lima o na enemi. Hoihoiia aku oia me lakou, a na ke kanaka nana i pepehi i kona mau makua, i lawe pu aku ia ia, a i kona wahi iho ma Kohala. Ia ia nae e noho ana malaila, loaia iho la oia ia Pahua, ke kaikunane o kona makuahine, a hoihoiia aku i Kona, a noho pu iho la me Pahua ma, a me Hina ma, ma Napoopoo. A ia ia i noho ai malaila, aoia iho la oia i ka oihana Kahuna o ka wa kahiko. He keiki hoolohe o Opukahaiia, aole nae he mahiai, a me ka lawaia, aole no hoi oia i ao nui ia ma ia mau hana. O ke ao kahuna wale no kona make-make nui, a ua lilo ia he puni nana e malama mau ai, i na po kapu o ka Hainapule. O kona mea nana i ao i ka oihana kahuna, o Pahua no. He kahuna akamai keia i aoia e Hewahewa, ke Kahuna Nui o ka heiau o Hikiau. A loaia ia Opukahaiia ka ike i na mea o ka oihana kahuna, alaila, kukulu iho la oia i kona wahi heiau pohaku maloko o Helehelekalani; a kukulu no hoi i hale maluna iho o kona wahi heiau, me ka malama ana i keia mau Akua ekolu, o Lono, o Kukaohialaka, a o Kukailimoku. A ma keia wahi

heiau ana i kukulu ai, ua kanu iho no oia he mau niu ekolu, a ke ulu nei lakou, a ke hua nei. Ke ola nei no kona ohana ma Kona Hema, o Hina kona inoa, ua hele nae a kuakea ke poo i ka hina, a ua palupalu no hoi ia e noho nei. (M. H. 1866.)

Maanei nae, e hoi hou kakou e nana i kahi moololo a Opukahaia i kakau iho ai no kona noho ana ma Kohala, a ma ia hope mai.

“Oia kanaka,” wahi ana, “ka mea nana i pepehi kuu makuakane a me kuu makuahine, ko’u mea nana i hoihoi i kona home. He wahine maikai kana, a he wahine lokomaikai no hoi; a pela no kana kane, aka no kona pepehi ana i ko’u mau makua, aole au i oluolu iki. Mahope iho o ko’u noho pu ana me keia kanaka no ka makahiki hookahi a elua paha, loa ia’u kekahi kaikunane a ko’u makuahine, oia hoi ke kahuna o lakou; aka aole nae ia i ike he aha la wau—no ka mea e ukulii ana no au i kona manawa i ike ai ia’u ma ko’u home me ko’u mau makua—a hai aku la au. I kona wa i lohe ai i ka inoa o ko’u makua, kulu iho la kona mau waimaka a moe haalulu iho la. Aole ona makemake e hoi hou au e noho pu me kela kanaka nana i

pepehi kuu makuakane a me kuu makuahine, aka e noho me ia e like me ka loihi o ko'u noho ana. Olelo aku au ia ia, e hoi hou au i hope a e ike i kela kanaka, malia paha o hookuu mai no hoi ia ia'u. Ua hanaia keia mea ia wa, hoi aku la au i ka hale, a olelo aku la i ke kanaka i na mea a pau a ke kaikaina o kuu makuakane i olelo mai ai ia'u. Me he mea la nae, oia olelo ana aku au ia ia, he mea oluolu ole ia nona. I kona manawa i lohe ai i na mea a pau au i hai aku ai ia ia, ua wela loa ia i ka inaina; me he mea la, e nana mai ana ia ia'u me he mau apana liliu la ia manawa. Aole ia e hookuu mai ia'u a hiki i kona wa make, a i ole ia o ko'u ola ke laweia e ia. Mahope iho, aole i loihi, hele aku la au a hai aku la i kahi o ke kaikaina o kuu makuakane i ka mea a ke kanaka i olelo mai ai ia'u. Aole ia i hookuu hou mai e hoi hou i ka hale o ke kanaka, a hiki i ka wa i hiki kino mai ai ua kanaka la, alaila, kuku pu laua me ia no keia kumu. Mahope iho o kuu noho ana me ke kaikaina o kuu makuakane, elua a ekolu paha la, lele mai la ke kanaka i kona hale e lawe hou ia'u i kona home. Aka, olelo aku ke kaikaina o kuu

makuakane ia ia, he keiki pono i au nana, aole ia e hookuu ana ia'u e hoi hou e noho pu me ia; a i ole ia ina ia e lawe ia'u, e lawe no ia ia maua a i elua. Aole i pane nui mai ke kanaka, no ka mea, he kahuna ke kaikaina o kuu makuakane. Aka ua olelo aku au i ke kaikaina o kuu makuakane, ina au e noho pu me ia, e malama pono ia'u e like me kona malama ana. Olelo aku la no hoi ia, 'ae.' I ka pau ana o keia mau mea a pau, noho iho la au me ke kaikaina o kuu makuakane no kekahi mau makahiki he nui wale."

Me he mea la, iloko o keia manawa, a mamua aku o ka hoihoiia ana mai o ke kuikahi i Hawaii nei, ka hoikeia ana mai o ka lima o ke Akua Mana Loa ma ka hoopakele alua ana ia Opukahaia mailoko mai o ka make hikiwawe a weliweli hoi. Maanei, e hoomaopopo ka mea heluhelu i ka lokomaikai o ke Akua, a me kona mau manao maikai, me ia ia Iosepa, ana i manao iho ai no ko Heneri Kini, a no kona lahui, a no Heneri iho no hoi, i kona hoopakele ana i kona ola. Oia, a me ke kaikuahine o kona makuakane e ola ana, haule pu iho laua iloko o na lima o ka enemi. I kekahi la, akahi no a komo iho

iloko ona ka naauao, o ke kaikuahine o kona makuakane, a i ole ia, oia no ke pepehiia a make. O kona wahi kumu wale no i pakele iki ai, o ke kolo ana maloko o kekahi puka iloko o ka hale ilalo, a oia ka manao i kupu mua ae iloko ona i pakele ai ia. Malaila aku ia e hele ai a kahi mamao loa mai ka hale aku ona i hoopaaia'i. Aole nae i liuliu iho, ike aku la ia i ke kaikuahine o kona makuakane e laweia mai ana iwaho e na enem i he nui wale, a lawe loa ia'ku i ka pali, a malaila kona wahi i kiolaia'i a make iho la. Ua ike aku la ia i keia mea i hanaia; ia wa i kona manawa no i ike aku ai e hoi ana ka enem i, o kona holo pololei aku la no ia i kahi i make ai ke kaikuahine o kona makuakane me kona manao e kiloi ia ia iho a make pu me kona makamaka, no ka mea, ua komo iho ka manao iloko ona, o ka pilikoko hope loa ia o kona ohana. Aka, ia ia e holo ana, ike e ia mai la oia e kekahi alii a o ke poo o ia aoao, a nana i kauoha'e kekahi mau kanaka ona e hoihoi mai ia ia. O kona lele aku no hoi ia i ka pali, loa e i ua mau kanaka la, a hoihoiia'ku la ia i kahi i hoomoana'i o ka enem i, a ua hoopakeleia oia me ke aloha no

kana mau hana, a e ike koke no kakou ma ka moololo e hiki mai ana mahope.

“I ka make ana o ko’u mau makua,” wahi ana, “me lakou no au; ua ike no au i ko lakou pepehiia ana me ka elau, a me lakou pu no hoi ko’u wahi kaikaina uuku, aole i oi ae mamua o na malama elua a ekolu paha. Pela au i noho hookahi iho ai me ko’u makuakane ole a makuahine hoi ma keia honua waonahale. I iho la au ia’u iho, auwe no hoi au! he makuakane anei ko’u a he makuahine paha ma ka hale, i hiki ai ia’u ke hele e imi a loa lakou e noho ana ma ka hale?”

“Aole, auwe no hoi au e! A oiai au e paani ana me kekahi mau keiki e ae—a mahope iho o ko makou paani ana, hoi aku la lakou i ko lakou mau makua—a owau hoi, uwe iho la au, no ka mea, aohe o’u home. Ua laweia mai au mai ko’u home mai a hiki i keia wahi malihini, aole i naauao nui aku i kekahi mea, aka, ua makemake au i makuakane, a i ole ia i makuahine, a o ka moe wale iho la no i ka po me ke ao.”

“Ia’u e noho ana me ke kaikunane a ko’u makuahine, ua kupu ae ka manao iloko o’u e haalele i kela aina (Hawaii,) a e hele ma ke-

kahi wahi e ae o ka honua nei. Aole no o'u manao nui i ko'u wahi e hele aku ai. Komo iho la nae ka manao iloko o'u, ina au e hele i ka aina e, loa paha ia'u ka maha a me ka oluolu, mamua o kuu noho ana malaila me ka makuakane ole a makuahine ole hoi. Manao loa iho la no au, ua oi loa aku ka maikai o kuu hele ana, mamua o kuu noho ana. Ma ia manawa, ua hiki mai kekahi moku mai Nu Ioka mai, o Birinola (Brintnall) ke Kapena. I loa no a komo ua moku la iloko o ke awa, ma kahi no o'u e noho ana, o ka hauoli koke ae la no ia o ko'u manao e ake no e holo, a ina i ku e ole mai ke Kapena o ko'u holo kauwa no ia nana, a hoolohe hoi i kana olelo. I loa no a kuu ka heleuma, o ko'u e-e aku la no ia iluna. O ka ninau koke mai la no ia o ke Kapena, o ka wai keiki la oe. Aole nae au i lohe iki aku i kana mea i olelo mai ai ia'u, no ka mea, aole hiki ia'u ke olelo i ka olelo Beritania. Aka, malaila no nae kekahi kanaka opiopio i ike i ka olelo Beritania, nana i olelo aku i ke Kapena he keiki au na ke Kahuna (ke kahuna o ia wahi.) Koi mai la ke Kapena e noho au maluna o ka moku ia po, a i kekahi la ae alaila hoi, olioli loa

iho la au ia mea, a o ko'u ae aku la no ia e noho. I ke ahiahi ana iho, kauoha mai la ke Kapena ia'u e ai pu au me ia. A malaila no kahi i noho pu ai o kekahi keiki he hoahela no'u, o Toma Hopu kona inoa—o Toma, he inoa ia i haawiia aku e ke Kupakako o ka moku. Mahope iho o ka aina ahiahi, hooninaninau mai la ke Kapena ia maua, ina he makemake ko maua e holo i Amerika. Ia wa, kunou koke aku la au i maopopo ai ia ia ua makemake io au e holo. He kanaka oluolu loa keia Kapena, a na kona lokomaikai i hoo hauoli mai i ko'u puuwai, me he mea la, he keiki pono i au nana, a he makuakane pono hoi ia no'u. Nolaila, ua komo loa iho ke aloha iloko o'u, a hoomau loa iho la au ia mea no kona lokomaikai ia'u.

“Ia kakahiaka ae, koi mai ke Kapena ia'u e lele i uka e ninau i ke kaikunane o kuu makuahine, ina ia e makemake ana e hookuu mai ana ia'u e hele. Ia wa, o ko'u kau iho la no ia iluna o ka waa a holo aku la a pae iuka a loa ke kaikunane o kuu makuahine; e noho ana no ia ma ka hale. Ninau mai la ia ia'u i ko'u wahi i hele ai a ao kela po mamua. O ko'u hai koke aku la no hoi ia ia ia,

maluna au o ka moku, a malaila ko'u wahi i noho ai a ao ia po; a hai hou aku la no hoi au ia ia i ka'u mea i makemake ai, oia hoi ko'u holo ana i ka aina e, a me na mea a pau a ke Kapena i kauoha mai ai ia'u. I ka manawa o ke kaikunane o kuu makuahine i lohe ai e haalele ana au ia ia, o kona pani iho la no ia ia'u iloko o ka hale, no ka mea, aole ona makemake e hele au. Oiai e noho ana au iloko o ka hale, komo mai la kuu wahi kupunawahine a ninau mai la i ke kumu o kou makemake ana e haalele ia lakou, a hele aku me ka poe a'u i ike ole ai. Olelo aku la au ia ia, ua oi aku ka maikai o kuu hele ana mamua o kuu noho ana maanei. Pane mai la ia, ina au e haalele ia lakou, aole loa au e ike hou ia lakou. Olelo aku la au ia ia, aole e nui na malama e hala a hoi mai no au, ke mau nae kou ola ana. Ia manawa, o ka hahale e mai la no ia o ko ia la mau waimaka, a pane mai la he keu au a ke keiki naaupo. O kana mau wahi olelo wale iho la no ia, a puka aku la i waho o ka hale. I loa no i na wahi luahine kupunawahine nei o'u a puka i waho, o ko'u aloalo ae la no ia mao a maapei me ka manao e loa kahi wahi hakahaka e

puka ai i waho o ka hale. I ko'u manawa i ike aku ai he wahi hakahaka uuku ma ka aoao o ka hale, o ko'u wa no ia i puka malu ai i waho a holo aku la au a kau iluna o ka moku. I ka wa i lohe ai o ke kaikunane o kuu makuahine aia au iluna o ka moku, o kona kau iho la no ia iluna o kona waa a holo mai la iluna o ka moku me ka ninaninau ia'u. Aole i liuliu iho, o ko'u loa koke iho la no ia i kekahi kanaka o ko'u lahui, no ka mea, oia ka mea nana e malama ka moku, a nana au i lawe ae mai lalo ae a haawiia aku la au i ka lima o ke kaikunane o kuu makuahine, a hoi aku la maua. Ua olelo mai ia, aole ia e hookuu ana ia'u, aia a uku au i ka puua no kona akua; (no ka mea, ua lawe ia au malalo o kona malu e ao ia'u ma ka oiha-na kahuna.)

Maanei kahi pohihihi o keia moolelo, aole i hoikeikeia mai ka uku io ia ana o ka puua no kona hookuu io ia ana a me kona aeia ana e holo i Amerika. Aka, ua aeia no nae ia e holo.

“O ke kaikunane o kuu makuahine,” wahi ana, “aole ia e hiki ke kaohi hou mai ia'u, a ua haalele aku au ia lakou me ka haawi aku

i ko'u aloha. O ko'u kaawale ana me lakou, aole ia he mea oluolu i ko lakou manao, aka, ua manao nui loa iho au e haalele i ko'u mau makamaka, me ka ike hou ole ia lakou ma keia ao. Mahope iho holo aku la makou i ka Pae Aina Sila (Seal) ma ka Akau Komo-hana aku o Amerika. Ma keia mau mokupu-ni, ua waiho iho ke Kapena i na kanaka he kanakolu no ka pepehi ana i ke Sila, a holo loa ae ia i Hawaii. Ua loa aku no ia makou, e oluolu maikai ana no lakou. I waena o keia poe kanaka, ike iho la au i kekahi kana-ka opiopio oluolu loa nona ka inoa o Rusela Hubada (Hubbard,) keiki a Kenela Hubada o Nu Havena. O keia Mika Hubada, he haumana ia no ke Kulanui o Iale; a he hoa-aloha no hoi no Kristo. I kuu manawa i ike ai ia ia, e noho ana no o Kristo me ia, aole nae au i ike. Hauoli ke kanaka e hilinai ana i ke Akua! He kanaka lokomaikai o Hubada ia'u i ko makou holo ana, a nana au i ao mai i na hua palapala ma ka buke pela Beritania."

"Noho iho la makou ma keia mau moku-puni, (oia hoi na mokupuni o ka pae aina Sila,) no na malama eono, alaila, holo makou

i Hawaii. Aia hoi iluna o ua moku nei o makou, elua mau kanaka o ko'u lahui; o kekahi kanaka, manao no e noho i Hawaii, a o kekahi hoi, manao no e holo loa ma ia holo ana. Aole i liuliu ke kali ana o ka moku, he mau wahi la wale no; o ka holo no ia o makou i Kina, a malaila aku, holo makou i Amerika. Ma ia holo ana o makou i Kina, haule iho la o Toma kuu wahi makamaka aloha iloko o ke kai. No ka noonoo ole loa no, aole hoomaopopo i kahi ana e hele ai, hele no oia mawaho o ka moku e huki ai i bakeke kai i mea holo i pa, (no ka mea, oia hoi ke Kapena-poe.) I ka wa i luli ai o ka moku, o ka haule aku la no ia iloko o ke kai. O ke kahea ae la no ia o ke Kapena i na luina a pau, e pii mai iluna o ka papahale o ka moku, a kauoha ae la oia, e puia na pea. Ia makou e lawelawe ana i na pea o makou, nalowale aku la o Toma kuu wahi makamaka mai o makou aku. Ia ia e au ana iloko o ke kai, wehe ae la oia i kona lole a pau i mama ai oia. A hoohuli ae la makou i ka moku; a hele imi aku la makou mahope ona. I ka loa ana'ku ona ia makou, ua kokoke e make. O ka loihi o ka manawa o kona noho ana

iloko o ke kai, elua hora me ka hapa. A i ko'u ike ana'ku ia ia, he mea e ko'u hauoli—no ka mea, ua manao wau o kona manawa no la ia e hele ai.

“A holo aku la makou ma ka ihu mua a makou i holo mai ai. Aole i emo, o ko makou hiki aku la no ia ma kekahi aina o Kina, a i ke ahiahi, mahope iho o ka napoo ana o ka la, hookuu iho la makou i ko makou heleuma. I ke kakahiaka ana'e, kipu makou i pu kahea no ke Pailata. I ka lua o ke kipu ana o makou; aia hoi kekahi manuwa Beritania e ku ana ma kahi mamao aku mai o makou aku, elima mile ke kaawale. A i ko lakou lohe ana i ka pu a makou, alaila, hoo-una mai la lakou i kahi wahi moku kialua o lakou, a pau aku la makou i ka laweia maluna ona no kekahi manawa. A laweia aku la ke Kapena o makou iluna o ka moku manuwa Beritania, a noho oia malaila a hala kahi mau la. A mahope iho, ae mai la na kanaka Beritania e hookuu ia makou; a haalele iho la makou ia wahi, oia hoi o Makao, a holo aku la makou i Kanetona (Canton.) A kuai lilo aku la makou i na ili sila a pau a makou, a hooili hou makou i ka moku o makou me

kekahi ano ukana e ae, oia koi ke ti inu, kinamona, lōle lainakini, silika. A i ka pau ana o na malama eono, holo makou i Amerika.

“A hiki makou i ka Lae o Kuke Hope, a mamua mai paha; alaila, hoomaka mai la na luina haole o makou e hooweliweli mai ia makou. I mai la lakou, “Aia kekahi kanaka o Nepetune (Neptune) kona inoa, kona wahi kela, a o kona wahi noho nae, aia iloko o ke kai.” I ke aliahī ana iho, hoomaka mai la ua poe luina nei i ka hana penei: Lawe ae la kekahi luina i ka pililakeke nui kahiko a aahu iho la oia, a he o-le ma kona lima; a o kona poo hoi, ua uhiia me ka ili-hipa; a hele aku la oia a mamua o ka moku, alaila, uwalau ae la oia me ka leo nui. Ia wa nae e noho ana maua me Toma kuu wahi makamaka mahope, mamua iho o ke kiahope, e hoolohe ana no maua i ke kamailio mai o kekahi poe luina ia maua no Nepetune, i ka holo mai maluna o ka waa-hao, me ka hoe hao. Alaila, ninau aku la o Toma no ke poho ole o ka waa-hao iloko o ke kai, “Aole,” wahi a kekahi o lakou, “He hiki no hoi ia ia ke hoolana, no ka mea, he Akua oia.” Ia makou e

kamailio ana, a o ka mea mua a makou i lohe ai, he leo no ka o-le. Penei:

“Aloha oe, e ka moku! Mai hea mai nei oukou?”

Pane koke aku la ke Kapena penei, “Mai Kanetona mai.”

“Ua loa anei ia oe kuu mau keiki?” wahi, a Nepetune.

“Ae,” wahi a ke Kapena.

“Ehia mau keiki i loa ia oe?” Ka ninau a Nepetune.

“Elua,” wahi a ke Kapena. (Oia no hoi au a me Toma kuu wahi makamaka.)

“Ia lohe koke ana o maua ia i ana aku o ke Kapena ‘elua,’ ko maua piha loa iho la no ia i ka makau a ane make, a manao hou ae la maua i ka aina hanau. Makemake loa o Nepetune e ike ia maua, aka, aole nae hoi o maua lihi launa aku. Hoomau mai la no oia i ke kahea ia maua, e hele aku i ona la, a i ole, lawe oia ia maua a elua i mau kauwau nana. Nolaila, o ko maua hele koke aku la no ia, a lulu lima maua me ia ma ke ano makamaka. Kuhi no hoi au he kanaka elema-kule loa la, i ka ike ana aku i ka loloa o ka umiumi, o ke poo hoi ua hele a poohina; i

ka uhiia ana iho i ka ili-hipa maluna. A mahope iho o ko maua kamailio ana me ia, makemake ae la oia i mea inu. O ko'u hele aku la no ia e hoopihia i na bakeke i ke kai, (e like me ka olelo a na luina ia maua,) o ko'u lawe mai la no ia a waiho imua ona, elua bakeke kai. O ko ia la lalau iho la no ia i ka o-le ana, a hoo mai la iloko o kuu waha i ka nuku, i inu ai au i ke kai a'u i lawe mai ai. Aka, ia ia i kulou aku ai e lalau aku i na bakeke kai, o ko'u paa ae la no ia i ua kanuku nei a kau ae la ma kekahi papalina o'u, i ole ai wau e inu i kauwahi kulu kai; aole nae i ike mai, ua poelele loa iho la. A o Toma hoi kuu wahi makamaka, ua piha loa oia i ka makau, a inu iho la oia i kekahi bakeke kai a pau loa. Ia kakahiaka ana ae, o ka maimai la no ia o Toma, a o ka luai aku la no ia mai ke kakahiaka a ahiahi.

“Ma keia wa, ua aneane e pau loa ka ai a makou a me ka wai, hookahi wale no wahi berena no ka la, a he hookahi paina wale no o ka wai a ke kuke e ninini ai i wai ti no makou. Kau nui aku la makou e ake o ka ike aku i kekahi moku. A hala kekahi mau la, kokoke makou i kekahi moku kuna, mai

Bosetona mai, e holo ana i Inia Komohana. Ko makou ki aku la no ia i ka pu, i kali mai ai o ia; a kali io mai la no ua moku la. A loaa mai la ka ai a makou a nui e like me ka makemake, ua lawaia ai na makou a hiki i ko makou ku ana i Nu Ioka.”

MOKUNA II.

KONA HIKI ANA I AMERIKA A NOHO OIA MA NU HAVENA, (NEW HAVEN) A MA TORINIFORDA, (TORRINGFORD.)

“HIKI makou i Nu Ioka i ka makahiki 1809; noho makou a hala kahi mau pule, a mahope mai o ka pau ana o ka waiwai o ka moku i ke kuaiia e ke Kapena, alaila haalele iho la na luina o makou, a hoi aku la kela mea keia mea i ko lakou wahi iho. Noho no maua me Toma kuu wahi makamaka, me ke Kapena iluna o ka moku. I kekahi ahiahi, hele mai la kekahi mau keonimana elua iluna o ka moku e ike ai ia maua. I ka pau ana o ke kamailio ana a makou, koi mai la laua ia maua e hele pu maua iloko o ka hale hana lealea, e hoikeike mai ai ia maua i na mea hou. O ko maua hele aku la no ia me laua a hiki iloko o ka hale lealea, i nana aku i ka hana, aohe kanaka mai he ai, aole au i ike i ka lehulehu o na kanaka e like me ia mamua. Noho maua a ahiahi, hoi maua iluna o ka moku. Ia kakahiaka ana'e, hiki hou

ana no ua mau keonimāna nei, a koi hou mai la ia maua e hele hou me laua ma ko laua wahi, ia awakea ae. O ko maua hele no hoi ia a hiki i ka hale noho a liu wale; nalu wale iho la no au iloko o'u i ko'u ike ana aku e ai pu ana na wahine me na kane, a he mea ano e ia ia'u."

"A hala kahi mau la, o ko makou haalele iho la no ia i ka moku me ke Kapena, a hoi pu aku la maua me Kapena Birinitinala, (Captain Brintnall) ma kona wahi ma Nu Havena, oia hoi kona wahi i noho ai. Noho pu wau me ia no kahi mau manawa malaila. Ma keia wahi au i launa nui ai me na haumana o ke Kulanui. A na keia poe haumana manaoio i hai mai ia'u no ke ano o ke Akua, a nui aku mamua o ka'u mea i lohe ai mamua; aole nae o'u ike i ka oiaio oia mau mea i haiia mai, no ka mea, ua naaupo loa au. He nui wale na manawa a'u i make-make ai e lohe hou aku i kahi mau ano hou aku o ke Akua; aka, aole loa ia'u o kekahi mea nana e wehewehe mai. Hele no wau i na halawai he nui ma ka la Sabati; eia nae ka pilikia, aole hoomaopopo o'u i ka ke Kahuna; he wahi mea uuku o ka olelo Beritania

i hiki ia'u ke hoomaopopo, a ke kamaio. O Toma hoi o kuu wahi makamaka, hele no oia i ke kula i kekahi o na haumana o ke Kulanui, mamua o ko'u manao ana e hele i ke kula. Lohe wau i kekahi moku e makaukau ana e holo mai Nu Ioka a i Hawaii iloko o kahi mau la. Makemake iho la ke Kapena e haalale au i keia aina (Amerika,) a e hoi au i kuu aina hanau ke makemake wau. Aka, aole o'u oluolu ia mea. Makemake no wau i keia aina a lohi-iki aku. A noho iho la au a hala he pule ma ia hope mai, ike wau ia Mi. E. W. Dwaita (Mr. E. W. Dwight,) nana hoi au i ao mua i ka heluhelu a me ke kakaulima. I kinohi a'u i ike ai ia ia, ninau mai la oia ia'u ina paha owau kahi i holo pu mai ai me Toma, (no ka mea hoi, ua ikeia o Toma e na haumana o ke Kulanui.) I aku la wau ia ia, owau no hoi kahi i holo pu mai ai me ia. Alaila, ninau mai la oia ia'u i kuu makemake i ka heluhelu a me ke kakaulima. I aku la au, "Ae." Alaila, i mai la oia ia'u e hele aku wau i kona keena i ka po, a e hoomaka ke ao. Alaila, hele aku la au i ke ahiahi, a hoomaka iho la e heluhelu maloko o ka buke ao-sepela. A kauoha hou mai la

no o ua o Mi. Duaita ia'u e hele aku ma kona keena i kekahi manawa, ke ae kuu Kapena. A hai aku la wau i keia mea i kuu Kapena. A olioli iho la oia, a makemake iho la oia e hele wau i ke kula ia Mi. Duaita. O kuu hele mau no ia i ke kula no kekahi mau mahina."

I ka hiki mua ana o Opukahaia ma Nu Havena, aole ona ano hoihoi. O kona aahu, o kapa mauaua o ka poe sela, he ano kaumaha, aole akeukeu. A aneane kona makamaka e haalele ia ia, no ka manao he makehewa wale ke ao aku ia ia. A i ka wa nae i ninauia aku ai oia, "He makemake anei oe i ke ao?" Alaila hoomaka mai la kona helehelena e hoihoi. A hooholoia ka manao e hele oia i ke kula i kahi la'e, alaila, puliki paa iho la oia ia manao me ka ikaika o kona manao.

Aole loihi kona ao ana, mai ka hoomaka ana, o ka loa mai la no ia o kahi ike mahua i ka olelo Beritania; a pau aku la kona ano kaumaha i manaoia'i ma ka nanaia ma kona helehelena. A ikeia aku la ka haka pono ana o kona mau maka i na mea e maalo ana ma ona la, a loa ia ia ke ano hou o ka ike ana i na kanaka a me na mea a pau o

kela ano keia ano ana i ike ai. O ka mea mua i ikeia ma kona ano, oia ka emi ana mai o ka manaka o kona manao mamua o ka mea i manao wale ia, penei:

I kona hoomaka ana e heluhelu i na huao-
lelo mahele hookahi, a mahele elua maloko o
ka buke ao-sepela, aia hoi, he mau hua i ane
hiki ole ia ia ke puana pololei, o na mahele
olelo nae i komoia ka hua palapala R., a oia
ka hua pilikia o na hua e ae a pau, o ka pua-
na ana ia hua, ua like me L. Ma kela helu-
helu ana keia heluhelu ana, ua hooonopono-
ia oia e puana pono i ua hua la, ma ka haawi
ana'ku i kekahi mau hua olelo penei: "*E
hoao oe e Opukahaia, he mea akaka loa.*"
(Try, Opukahaia, it is very easy.) Pela ka
hana pinepine ana; a o ka loa no ia, a kani
ae la ka lakou a-ka iki.

Aole liuliu mahope mai; oiai ua mahuahua
ae ko Opukahaia ike ma ka olelo ana ma ka
olelo Beritania. Hoolilo ae la kana kumu i
kekahi ahiahi ma ke kamakamailio ana me
ia, a me ka ninau ana ia ia no ke ano; a me
na hana o kona aina pono. Eia kekahi mea
ana i hai mai, o ke ano o ka inu ana o na ka-
naka o kona aina, mai na waipuna mai, ke

hele lakou ma na wahi e. O ke kiahā a lakou i kiahā ai i ka wai, oia no ko lakou lima; he puili ae i na lima elua, a hooohu ae i ua mau lima nei, a he mahūahua no ka wai ke kioe iho. No keia mea, ua hoike mai no oia ma ka hana ana me kona mau lima, a hapai ae i kona mau lima ma ka waha, me ke kapeke ole o ke kulana mua. A hoao iho la ke kumu i ka hana ana; a mamua iho o kona hapai ana ae i kona mau lima, ike iho la oia, ua huli ano e na lima, a nalo loa kona ano maoli. A no ka pono ole o kana hana mua ana, kuawili hou iho la oia ma ka hoao hou ana, a manaka wale iho no ka hemahema. Make loa iho la nae hoi o Opukahāia i ka akaaka, a i aku la oia i ke kumu, "E hoao hou oe e Mi. Duaita, *he mea akaaka loa.*"

Ma keia manawa, ua ikeia aku no hoi o Opukahāia e noii ana i kela mea keia mea o ka olelo, a me ke ano o na mea e hoopuni ana ia ia; a i waena konu hoi o kona ano hemahema ka olioli o ka lehulehu, ma kona hoakaka ana'ku.

I kekahi la hoi, noho iho la oia ma ka papa-helo, a unuunu mai la i ka pulima o kona palule iluna, a holoholo ae la oia ma kela

aoao keia aoao o ke keena, a ninau iho la, "Owai keia?" "Who dis?" A hoomaopopo ae la ka lehulehu i kona ano. Alaila hoano e hou ae la oia i kona kulana, a pane hou ae la oia, a owai keia? "Well, who dis?" A ua hoomaopopo pono ia keia mea o keka-hi haumana o ke Kulanui, aole mea kanalua no ia mau mea.

O kona hemahema ana ma keia wa, e hiki no ke aoia. A mahope mai o ka manawa ana e hoapiki ana, pane aku la kona makamaka ia ia, "E Opukahaiia e, he makemake anei oe e ike i ke ano o kou hele ana?" A oluolu mai la oia i ka nana aku, a hoao iho la oia ia mea. Hooikaika loa oia ma ke kuwili ana i ka ninau. "Pela ka'u hele?" A mahope mai o hona ike pono ana i ka oiaio, alaila, hu ae la kona aka, a haule iho la oia maluna o ka papa-hele.

O kela ano, ua loaa mai no mamuli o ka maa ana i na akua kii o na aina naaupo. A o ka makamua i aoia aku ia ia, oia hoi na ano o ke Akua. Ua hoomaa e oia i na hana hoomanakii, a akaaka no oia ia mau ano, a i mai la hoi oia, "O na akua o Hawaii, e lapa-lapaia ana no lakou e ke ahi. Hoi au i ka

hale, puhia lakou e 'a'u i ke ahi, no ka mea, aole o lakou ike, aohe lohe, aole no hoi i kekahi mea e ae." Alaila, pane hou ae la oia, "Na kakou i hana ia lakou. O ko kakou Akua, (nana ae la oia iluna,) nana kakou nei i hana." Eia hou kana moolelo:

"Aole o'u makemake e noho hou me ke Kapena, a ke makemake nei au e noho ma kauwahi e aku, ma kahi e loa'a i ia'u ka wa e ao ai i ke kakaulima a me ka heluhelu. Hele aku la au ma kahi o Mi Duaita, kuu makamaka lokomaikai, a hoike aku la au i kuu mau iini a pau ia ia. I aku la wau ia ia, he makemake au e loa'a ia'u kahi e loa'a ai ia'u ka hele ana ma kekahi kula, a hana lima hoi i kekahi manawa. Alaila, i mai la oia ia'u, e noho wau me Peresidena Duaita, (President Dwight.) He mea oluolu loa iho la no ia ia'u, a hele aku la maua ma kona hale. Noho iho la au me keia ohana haipule no kekahi mau manawa, a hele wau i ke kula a ke kanaka nana wau i ao mamua. O ka mua keia o ko'u huipu ana me ka ohana e haipule ana i ke kakahiaka a me ke ahiahi. O ko'u mea pilikia nae, o ka hoomaopopo ole i ka mea i oleloia ma ka pule; aka nae, aole

o'u kanalua i ko lakou pule ana no'u, i ko'u wa i noho pu ai me lakou; a ike iho la wau i ko'u naaupo i ko ke Akua ano, a me ko kuu Hoola. Lohe pinepine au i ke Akua i ko'u noho ana me keia ohana, a manaoio iki no wau. Ia'u e noho ana me Kauka Duaita, hele aku la wau ma kuu keena kuia i kekahi ahiahi, a ike aku la wau ia Mr. Samuel J. Mila, he keiki hoi oia na Rev. Samuel J. Mila o Torinifoda, e noho pu ana me Mr. Duaita kuu kumuao. A kena mai la o Mr. Duaita ia'u e ike ae ia Mr. Mila. O ko'u hele aku la no ia a lululima pu me ia. Ua noho o Mr. Mila ma Nu Havena no kekahi mau malama. Ia maua nae i launa pu ai, o ko ia la koi mai la no ia ia'u e hoi pu me ia ma kona wahi; me ka i mai he makuakane maikai kona, he makuahine, he kaikaina, he kaikuahine. O keia koi ana, he mea oluolu loa ia ia'u, a o ko'u ae aku la no ia. Haalele iho la wau ia Nu Havena, a hele pu aku la maua me ia ma kona wahi. Hoomaka wau i ka noho me keia ohana i ka makahiki 1810. He keu aku keia poe kanaka ma ka naauao a me ka lokomaikai. Launa pu wau me lakou me ke aloha maoli, (aole nae wau i ike i

ka mea nana wau i lawe mai ilaila, no ka mea, ua naaupo loa wau ia Iehova, ka mea nana i haawi mai ia'u i na makamaka he nui ma keia aina.) Me he mea la o ko'u wahi pono ia. He pinepine ko'u hookauhale ana malaila. He hiki no ia'u ke kamailio a nui no lakou, aka, aohe no nae he mea nui e ae a'u e hana ai, aka, o ka hoomanao wale no i ka nui o ko lakou lokomaikai ia'u. Ia'u nae e noho pu ana me lakou, ua hoomau no wau ma ka hooikaika ana i ka hookuikui, ka heluhelu, a me ke kakaulima ana ia Mr. Ieremia Mila, ke kaikaina o Mr. Mila, ka mea hoi i launa mua me a'u i kinohi. Maanei wau i ao ai i kekahi mau ano o ka oihana mahiai, oia hoi ke oki wahie, uuolona, oki mauu, a me ia mea aku a ia mea aku; ma ka nana wale aku no nae i ka hai hana mai, a hoohalike aku la."

I ka loaa ana ia Opukahaiia ke kauwahi kokua mai a Mr. Mila mai no kana hana, a hoopaa koke iho la oia ma na hana e pili ana i ka mahiai. A he hana hou keia ia ia, a ikeia iho la oia e oi ana ma na mea ana e lawelawe ai me kona mau lima. Alo e oia i ka hai hana mai, i ka mea ana i makemake

ai mamua o kona makaukau ana e lawelawe, a ua hana no oia me ke akamai i kela ano hana keia ano hana.

O keia wahi leta malalo nei a Mr. Mila mai, ua hoakaka mai oia no ke ano o Opukahaia, e i ana penei: "Aia kekahi mea ano e ia Opukahaia. O kona hoolohe, ke maalo nei mamua ona, a o kona lawelawe ana, he kali a maopopo loa ia ia. Aole loa no oia i ike i ke oki mauu ana, a palaoa paha mamua o kona hoi ana mai a noho me a'u. Hoolako aku ka'u keiki ia ia me ka pahi loloa oki mauu. He ku ka ia la hana e nana ai i ka hana ana a pau, alaila hana aku. A mahope mai, ikeia iho la oia e kekahi kanaka ma ka mala; aohe e loa elua mea oki palaoa e oi ae mamua ona ma ia mala. Ma keia mau mea, a me kahi mau mea e ae, ua maopopo loa he keiki nui o ke akamai."

I ka wa a Opukahaia e noho ana me ka ohana o Mr. Mila, "o kela hooikaika ana keia hooikaika ana, ua loa mai no ka uku ma ke ano hou ana o kona manao; a o kona holo mua ana ma na mea ike, ka mea ia e manao ai ka poe nana i ao ia ia, aole i poho ka lakou mau hana. Hiki wawe kona ike i ka

hookuikui i na mea oloko o ka Buke Ao-Sepela; a he mau mahina wale no, o ka hiki no ia e heluhelu i ke Kauoha Hou. Ma ia wa no, o ka loa no o ka ike ia ia ma ke kakaulima ana. E like me ka hiki wawe o kona ike ana ma ka heluhelu, pela no kona hiki wawe ma ke kamailio ana ma ka olelo Beritania. A i ka hiki pono ana ia ia ke kamailio i kona mau manao ma kela ano keia ano, a hoakaka no oia i kona manao aloha no na kanaka o kona aina.”

Hoao iho la o Heneri Opukahaiia e hoomaka ma ke kakau leta ana. O kana leta mua nae, ia Toma Hopu ma Nu Havena, a o ka leta alua, ia Mr. Duaita ke kumu mua ana. O ka leta hope loa, ua malama ia, a no ke kupono e waiho aku i ke akea, nolaila, ke hookomoia nei maanei. He wahi kope oiaio keia.

“TORINIFODA, Mar. 2, 1810.

MR. E. DUAITA, ALOHA OE—Eia no wau ma keia wahi i keia wa—he nui ko’u hauoli e ike aku ia oe. He akaaka ko’u ia Toma Hopu, (Tom. Hoboo,) i ka i ana, “Ua kakau mai anei o Opukahaiia i na mea nau? Aole au i kakau.” “He makemake wau ia oe, e hai aku

oe ia Toma, ua i mai o Mr. Mila, ina e lilo io ana maua i mau keiki maikai, alaila, e loa no ona mau makamaka no maua. A ua ike no hoi paha oe i ke kakahiaka a'u i komo aku ai ma kou keena, ma ka hale o ke kula nui, a olelo mai oe ia'u e *heluhelu*—*a ninau no hoi oe, pehea ka puana ana i na hua c, a, p? Alaila, i aku ai no hoi wau, c, a, p, pig.* I keia wa, ua hiki ia'u ke hookuikui i na huao-lelo eha mahele, a eia wau i ka Ui. He nui ko'u makemake ia oe, a i kou kaikaina, a me Mr. Deana, (Mr. Dean.) He makemake no hoi wau ia oe, e kakau mai i leta na'u, a e hai mai no hoi i ka Toma hana.

HENERI OPUKAHAIA.”

“O Mrs. Mila, oia ka wahine a Rev. Mr. Mila, he wahine lokomaikai, a oluolu loa, manao nui oia ia'u, me he mea la o kana keiki pono wau. Ao oluolu mai no oia ia'u i ka *Ui*.

“He nui no na kumu (kahunapule) i hele mai ia Rev. Mr. Mila, nolaila wau i ikeia ai e na kumu he lehulehu. A no kuu ike ole i ke ano o ke Akua maloko o kuu naau, nolaila, aole o'u oluolu ma ka hoolohe ana aku i

ka lakou kamailio mai ia'u. Aole no hoi o'u makemake i ka noho pu ma kahi a lakou e noho ana; aole no hoi o'u makemake iki e hookokoke aku i kekahi kumu no ke kamailio mai ma ke ano o ke Akua; he mea uluhua loa ia'u ke hoolohe aku. Hahai mai lakou ia'u i ko ka lani a me ko ka po, aole nae o'u hoolohe aku i ka lakou olelo mai, no ka mea, ma kuu manao ana, ua like no ka pomaikai o ka mea ike ole i ko ke Akua ano me ka poe i ike. A i kuu hoomaopopo ana i ke ano o ke Akua, eia ka he manao ino ia o'u, a he manao kuhihewa weliweli loa ia."

MOKUNA III.

KONA NOHO ANA MA ANEDOVERA, (ANDOVER.)

“I KA pau ana o ka makahiki 1810, haalele iho la au ia Torinifoda, a hele aku la au i Anedovera, a noho iho la au malaila no kekahi mau manawa. Ma keia wahi kuu naau hewa i hoomaka ai e ike iki i na mea e pili ana i ke Akua; a o na mea a’u i ike nui ai, he mau mea i ao mua ole ia mai ia’u mamua. Oluolu no hoi wau i ke kamakamailio pu ana me na haumana o ke kula. Ua hoolilo wau ia’u iho ma ka hele ana e hoike i ka’u haawina i kekahi o na haumana ma ka hele ana, mai kekahi keena a i kekahi keena no ka wa pokole, no ka mea, ua hooliloia wau na lakou e malama ma ia mea. I ka wa e paa ai o ko’u haawina, alaila, komo wau ma kela keena keia keena o ke Kulanui e hoike ai i ka’u haawina. I kuu wa i noho ai malaila a loihi loa, o kuu makamaka pu kekahi malaila, oia no hoi o Mr. Mila; oia ho’ ka makamaka lokomaikai loa o’u, nana hoi au i lawe mai ka

hale mai o kona makuakane. Ma keia wa e ao ana o Mr. Mila opio i ko ke Akua ano, a o ko'u wa hoi ia e ao ia'na e na hoa hau- mana."

Ma keia wa i hoomaka'e ai o Opukahaiia, me kona makamaka i kamailioia ae nei, e pule imua o kekahi poe e aku. Pela no hoi kona makamaka, kukuli iho oia ilalo e pule ai, me ka huli ana o ke alo ia ia mamua o ko laua ala ana, a i aku la, "E pule oe." Hoomaka ae la oia e pule, a penei kana:

"E ke Akua Nui a mau loa—ka mea nana i hana ka lani a me ka honua, ka mea hoi nana i hana na mea a pau—e aloha mai oe ia'u—a e hoopau mai oe i ko'u pohihihi i ka Baibala—a e hoomaemae mai ia'u. E ke Akua Nui, e aloha mai oe ia Toma—e hoomaemae mai ia ia—a e hoihoi ia maua me Toma i Hawaii—e hoike aku i ko Hawaii poe, mai pule hou i na akua pohaku—e hoo- holo pu ia'u me kekahi kanaka kupono, e hai aku i ko Hawaii poe i na mea o ka lani— i ko ka po—Nau, e ke Akua, e hana na kana- ka a pau me ka maemae ma na wahi a pau loa—e aloha mai i ke Kulanui, a e hoomaemae i na mea a pau—e hoomaemae mai ia

Mr. Samuela—i kona makuakane, makuahine, kaikuahine, a me kona mau hoahanau.” (O ka pule a ka Haku aku mahope o keia pule ana.)

“Manao iho la o Mr. Mila e hoouna ia’u ma kekahi kula e aku, a e haalele ia Anedovera, i loa ai ia’u ka nui o ka manawa ma ke ao ana, mamua o ka manawa i loa ia’u ma Anedovera. I mai la oia, ina he makemake ko’u i ka hele, alaila, nana no e imi i poe maikai nana e malama ia’u. O keia haawina i haina ae nei, he oi aku ka maikai, aohe mea nui e ae a’u e manao ai, o ka lokomaikai lua ole wale no i loa ia’u. A hoounaia aku la wau ma ke kula o Barapoda, (Bradford Academy,) a malaila wau i noho ai, me ka hele ana i ke kula. O ka poe hoi o ka hale o Mr. Dea. Haselatine, (Dea. Hasseltine,) oia hoi ko’u wahi e ai ai, he poe haipule io lakou i ke Akua, oia no hoi ka ohana o Mrs. Judasona, ka misanere o Burema.

“Ia’u i noho ai maanei iloko o ke kula, o kuu mau manao a pau mamua, ua pau loa lakou i ka nalo mai o’u aku, a naaupo loa iho la au i na mea e pili ana i ke Akua, no ka hui pinepine ana me ka poe lapuwale. I iho

la wau, aole paha e loa'a hou ana ia'u kuu ano mamua aku nei, a e poino ana paha wau ma keia wahi, a ma keia hope aku. Aole o'u pule, aole no hoi he manaolana no ke aloha-ia mai, aole no hoi he makemake no ka noho hookahi e like me na la i hala'e mamua. O ka hele mau wale iho la no ka'u i na la a pau, a me ka noho ana, aole wa kupono e imi ai no ka nohoalii o ke aloha; a o ke ano hupo wale no ko'u, mai ke kakahiaka a ke ahiahi; aole no hoi he hoomanao i ke Akua, i ka mea nana wau i malama mai; aole hoi i ka wa e moe ai, aole hoi i ka wa e ala ai. Eoihi no ko'u manawa o ka noho palaka ana.

“I ka pau ana o ke kula, o ko'u hoi no ia i Anedovera. Ia hoi ana nae' o'u a hiki, aole o Mr. Mila, ua hoomaha ke kula, o ko'u noho iho la no ia a hoi mai ana; a ninau mai la kela i ko'u noho ana a me ko'u makemake i ka noho ana ma ke kula. Pane aku la au, maikai. Aole nae o'u hai aku i ke ano o ko'u noho ana, a me na pilikia i loa'a ia'u ma ka noho ana ma kela wahi i oleloia ae nei mamua, a waiho pu wale iho la no. iloko o'u ia mau mea.

“I ke kupulau o ka makahiki 1811, a noho

hoolimalima iho la wau i elua malama e hana ai me kekahi kanaka, i loa ai na mea e kokua ai i ko'u ola kino ana; elima paha mile ka loihi o kona wahi mai ke kula nui aku.

“I kekahi la, hoouna ua kanaka nei ia'u e hele i ka nahelehele e hana ai; o ko'u lalau aku la no ia i ke koi, a hele aku la wau i ka hana a awakea, alaila, hoi i ka hale. A ia'u i hiki ai ma ia wahi hana, he mea e ka ulu hou ana mai o ko'u mau manao, ma ka ike ana iho, he kulana weliweli loa ko'u ia wa. I iho la au, ina e make wau, he oiaio, e kiola ia ana wau i ka make mau loa. Me he mea la he leo e pae mai ana, 'Okia na kumu laau, no keaha la e hoopilikia wale ai i ka honua.' A oki iho la ka'u hana ana, haalele iho la wau i ke koi ilalo, a hele iki aku la au ma kahi e, (o hoounaia mai ke keiki e kii mai ia'u no ke kokoke ae i ke awakea.) A kuku-li iho la wau ilalo, a nana aku la wau ia Iehova Manaloa, e kokua mai. He mea haumia wau. He hiki i ke Akua ke kiola ia'u, ke manao oia pela, a he hiki hoi ia ia ke hana mai i ko'u ukane e like me ke kupono ia ia. Noho iho la no wau malaila, a kaheaia mai ana wau e ke keiki; a o ko'u hoi aku la

no ia. Ninau mai la ka poe oloko o ka hale ia'u; no ke ano kaumaha o'u—hai iki wale aku la no wau.

“I ka po, aole o'u hiamoe iki, hiaa loa a koke e ao ka po. O ko'u mau ano, a me na manao o'u i na manawa i kaahope ae, ku mai lakou iloko o ko'u hoomanao ana—a me ko'u hana ana i ke aloha o ke Akua i kuu wa ma ke kula nui o Barapoda. I ke kakahiaka ana ae, hele hou no wau ma ua wahi mehameha la o'u. A maanei hoi wau e hele ai i ke kakahiaka, ke awakea a me ka po. A loa iho la ia'u ka oluolu o ka manao ma keia wahi. I ko'u wa e hele aku ai malaila, he oi loa ko'u hauoli mamua o na la e ae.

“A i ka pau ana o na malama elua, a hoi hou aku la wau i Anedovera. Ninau pinepine mai la o Mr. Mila i ke ano o ko'u manao, aole no hoi o'u hai nui aku no ko'u mau hewa.

“Noho no wau malaila a hala kekahi mau la, hoolimalima hou no wau me kekahi kankamahiai. He kanaka maikai no hoi ia, a he ohana haipule no hoi kona. Like no a like keia noho ana o'u maanei, me kela noho ana'i mamua iho nei, aka, aole nae he ano hou io ae o ka naau.”

Ia Opukahaia e noho ana ma Anedovera, noho aku la oia elua makahiki me ka ohana o Mr. Abota, (Abbot,) he kuene hoi oia no ke Kula Kahunapule. He ohana malama pono keia, a oluolu hoi ma ka ike ana i kona ano akahai. Me ka waimaka lakou e kama-ilio ai nona. I ae la o Mrs. Abota i kekahi o kona mau makamaka, "he oluolu mau oia. Aohe o'u ike ia ia e huhu ana. Komo mai no ma ko'u keena, a kukuli iho no ilalo, a pule aku i ke Akua. Aole manao o Mr. Mila, he Kristiano oia ma ia wa; aka, ma ka nanaina, he ano manao ole i na mea e ae, hookahi wale no mea nui o ka haipule. A hai mai la oia ia'u mahope mai, i ka wa ana i makemake ai *e loaa ka manaoio haipule iloko o kona poo, mamua o ka makemake iloko o kona naau.*"

A hala na malama elua o kona nalo ana aku mai ka ohana aku o Mr. Abota, alaila, palapala mai la oia ia Abota wahiwahine, noloko mai olaila keia pauku malalo nei.

"Noonoo mau wau i kekahi mau manawa no kuu uhane, a me ka mea a ke Akua i hana ai. E kahea no wau i ke Akua—'Heha la ka'u e hana ai i ola ai wau?' Ua ike

no au, he hiki i ke Akua ke lawe ae i ka mea e makapo ai, a me ka naau hewa, a e hoo-ha-nau hou ia kakou mamua o ka make ana. I ko kakou wa e make ai, e ku ana kakou i ke alo o Kristo i ka la hookolokolo. E na makamaka, aole no paha oukou i lawehala iki, e hoopai mai ai ke Akua ia oukou? Pela no kuu manaolana, aole oukou i lawehala iki. Aka, ina aole kakou e lilo ana i poe makamaka nona, a i poe hahai aku ia ia, alaila, e kiola ana oia ia kakou iloko o ke ahi pio ole, a malaila mau kakou e noho ai ia ao aku, a ia ao aku. Ke lana nei ko'u manao, e hoomanao ana oukou i keia mau mea. Me oukou ke aloha o ka makamaka.

“HENERI OPUKAHAIA.”

Ia ia e noho ana ma Anedovera, lohe ae la oia aia kekahi makamaka ona malaila. A wiki aku la oia i ona la, a hoolilo iho la oia i kahi hapa o ka la, a me ka po i ka noho ana me ia me ko laua hiamoe ole. A i kona huli hoi ana, i mai la kona makamaka ia ia, “e Heneri, heaha kau mea hou mai Hawaii mai?” I mai la oia, “aole o'u hoomanao ia Hawaii, o Iesu Kristo wale no ka'u mea e olelo nui nei.”

Ma keia wa i ikeia'ku ai o Heneri i kona ano mikioi, no kona hooikaika ana i ka huli i ka Palapala Hemolele, a holo no kona nauao ma na mea e pili ana i ka manaoio haipule. Eia iho malalo nei na mea e maopopo ai.

Ninauia oia, ehia hana mana a ko kakou Hoola? A hoomaka koke aku la oia e pane koke aku, oia ka hooliloia'na o ka wai i waina, a hahai mai la a pa'u loa. Hiki anei i kekahi mea e ae o kona ano ke hana e like me keia, ka hahai mai i ka moolele o ka mea Hoola a loihi loa'ku, a me ka hiki pono ke heluhelu?

I mai o Mr. Abota, "aole e oluolu iki o Heneri ke ole e loa ka mea e imi ai pela ma kela mea keia mea ana e imi ai. Ua ikelea ia ia mea, i ka wa i pouli ai ka la ma kona ninau ana, i na ninau pohihihi, a pela no hoi ma na oihana e ae.

"I kekahi kakahiaka ikeia'ku la oia e paa ana i ka rula, e ana ana i ka hale kula a me ka pa. A ninauia'ku la oia, he mea aha ia au e hana nei. I mai la oia me ka aka iki mai, "I ike ai wau i ke kukulu ana o ka hale ke hoi au i Hawaii."

I kona wa e lohe ai i kekahi huaolelo ana i hoomaopopo ole ai, a i hiki ole hoi ke kamailio aku, o kona ninau koke aku la no ia ia Mr. Abota, "pehea e hookuikui ai i keia huaolelo?" I ka wa e hāia'ku ai, o ka paa loa aku la no ia aole e pōina iki.

I ko Mr. Abota nana ana'ku i kona ano, ma keia palapala ua makaukau maoli e hele aku i ka ike loa. Komo oia iloko o ke keena kuke i kekahi ahiahi a nakii malu iho la oia i kekahi laau o ka noho me ka lope, he kanka hoi ko luna o ua noho nei, a hoi loa'ku la oia, a ma ka paia noho iho la. Pane aku la oia, i ka ohana e noho ana ma kapuahi, "e, e." I keia'ku la iwaena o ka hale he mau wahi Keonimana kii e hulahula ana, e pekupeku ana i na wawae, me ka liki i na puupu, a hakaka, hina kahi ilalo a o kahi iho no; a pau ka hakaka ana, o ka lealea ae la no ia, a o ka lele koke ae la no ia a komo ana iloko o ka eke o Heneri. I ike oia i na wahi ana i noho ai, i kona wa i holo mai ai i Amerika nei.

A hoomaka iho la oia e kakau i leta i kona makamaka aloha e hahai aku ana ia ia i ke ano o kona ola kino mai kona haalele ana'ku.

O keia mau leta elua malalo iho nei ua kakauia ma Anedovera i ane like me ke kope mua, a me ka hooponopono iki ana i ke kiko ana.

“ANEDOVERA, Dec. 15, 1812.

“E KA MAKAMAKA KRISTIANO E—Aloha oe. Ua loa mai ia'u ka wa pono e palapala aku ia oe. Ua loa mai kau buke i hoouna mai ai ma ka lima o Mr. G—— a ua nui ko'u olioli nou no ia mea. He hauoli nui ko'u i ke Akua i kona haawi ana mai ia'u i makamaka no keia aina, kahi a'u a me oukou e lohe nei i na olelo a ke Akua. Lokomaikai ke Akua ia kakou, a i kahi poe e aku. Na ke Akua e alakai ia kakou ma kana mau hana.

“Aole wau i ike i ka ke Akua mea e hana mai ai i kuu uhane popilikia nei. Eia nae ka mea maopopo, e hele ana no au imua o ke Akua, a imua o Kristo.

“Nolaila he pono ia kakou ke hooikaika ma kahi a ke Akua i makemake ai ia kakou, malaila kakou e hana'i. He hiki i ke Akua ke hoola i na uhane lawehala a pau ke loa ia kakou ka homa'ao ana'ku ia ia, a me ka hana ana i na hana aloha Kristiano, oia hoi na hana i ku i ke aloha.

“A ke lana nei ko’u manao, e hoouna’ku ka Haku i kana Euanelio i ko na aina naau-po, i kahi hoi i ike ole i ka olelo a ka mea Hoola. A ke hoomana la ko laila i ka laau, ka pohaku, ka mano, a ua aneane no e pau loa na mea i ka hooliloia i mau akua; aole ka Baibala malaila, aole lakou i hoomaopopo i ko ka lani, a me ko ka po oia hoi o Gehena. Eia wau ke noho nei ma keia aina makua ole, hookahi makua o ke Akua ke hana wau mamuli o kona makemake, a haalele loa i ko’u mau iini iho.”

O keia leta malalo nei, ua kakauia’ku ia Rev. Mr. Mila o Torinifoda.

“ANEDOVEBA, Ian. 27, 1813.

“E KA MAKAMAKA KRISTIANO E—Aloha nui oe. Ua loa mai ka wa kupono ia’u e kakau ai i wahi leta nau. Ua loa mai no kau mau leta elua ia’u, a ua heluhelu wau i na olelo momona o loko, a na ia mau olelo i hoanuanu mai i kuu naau hewa nei me he wai huihui la. E ka Haku, e hoolohe mai anei oe i ka’u pule malu ana?

“E ka makamaka, ke hoomanao nei wau i kau pule ana no ka poe ilihune a me ka poe

makapo ma ka naau, a e loheia 'ana ia pule au. A ke noi aku nei wau ia oe e pule oe no'u i ke Akua, i ninini mai ai oia i ka Uthane Hemolele maluna o na uhane a pau. No ka mea, aole wau i ike i ka ke Akua mea e hana mai ai i ko'u uhane ma keia hope aku. Aka o ko'u manao maoli, he makemake loa wau i kana mau kauoha, a he makemake no hoi au e hana mai oia i ko'u uhane e like me kona ike ana he pono. Ke makemake nei ka poe hewa i na mea o keia ao, aole manao i ka hooleiia o ko lakou mau uhane iloko o ka lua hohonu. E, kai ka manomano o ko kakou mau hewa. Pehea la e hiki ai ia kakou ke hele ma ke ala o ke ola, a ma ka oiaio a me ka noho pu ana me Ia iloko o ka lani. Aole wahi e ae e hiki ai, eia wale no o ka paulele aku i ke Akua, o ka haalele loa i na hewa a me na mea like. Ke i nei kahi poe he hemahema i ka pule; ua ike no, no ka mea, ua ao mai o Kristo ia kakou.

“I ko'u hele ana i Tiniberi i kela pule aku nei, ike wau i kekahi wahi keiki mai Hawaii mai. (Aole o Toma Hopu.) Aole oia i ike i ke Akua maoli, he naupo loa ma ia mea mamua o ko'u hai ana aku ia ia. Ha-

hai mua aku la nae wau ia ia ma na mea i hoikeia ma Kinohi 1:1, a pela'ku, i ka hana ana o ke Akua i keia ao me kona mana iho; i mai la oia, manomano no hoi ko kakou naaupo i ka hoomana i ke akua laau a me ka pohaku; e haawi ai kakou i ka puaa, ka niu, ka maia me ka ai ole ia mai. I aku la wau, naaupo io no. A ninau hou mai la kela ia'u, "aia i hea ke kanaka nana i hana na mea a pau loa?" Pane aku la au, "aia ma na wahi a pau loa, a eia no hoi me kaua." A i hou mai la no, "he lohe mai no ia i ka kaua mea e kamailio nei la?" I aku la au, "ae, a e manaoio aku oe ia ia, ina e manao ana oe e lilo oe i makamaka nona." I mai la oia, "ke manaoio nei wau." Ma ka olelo Hawaii no ko maua kamailio ana, no ka mea, aole oia i ike, a i hoomaopopo hoi i ka olelo Beritania. Alakai wau ia ia ma kahi o ke kahunapule ma ka la Sabati, a hahai aku la wau ma ka olelo Hawaii ia ia i ka mea a ke kahuna e hai mai ai. He hele no ka oia mamua iho iloko o laila, aole nae he hoomaopopo. A hai aku la wau i ko ke Akua hoola ana mai ia ia ma keia aina. I mai la oia, nui ko'u makemake i ke Akua. He nui na ninau ana

e ninau mai ai ia'u no na mea e pili ana i ke Akua.

“I ka hoi ana o maua e moe, i-mai la kela, aole loa au e hoopoina i ke Akua. A i mai no hoi oia, ina e ai oia, alaila e hoomaikai aku no oia i ka mea nana e haawi mai ka ai. A o ka poe o kahi ana i noho ai, manao no e noho oia malaila a loa ka olelo Beritania, alaila hele i ke kula. I ko'u haalele ana'ku ia ia, noke mai kela i ka uwe.

I ka makahiki 1812, kohoia o Mr. Mila ka mea kokua nui ia Heneri Opukahaia, e hele e kokua i ka hana misionari ma na mokuaina Komohana a me ko ka Hema. Ia ia no a hala'ku, o ko Opukahaia hele no ia i Holisa, ma Nu Hamesire. I iho la o Opukahaia, ua noho au maanei me kekahi mau kanaka mai-kai elua. Oiai wau e noho ana maanei, hoopiha loa ia oloko o'u i ka hoomanao ana ia'u iho; hele pinepine loa wau i ka halawai a ka poe opiopio a oluolu no hoi ko'u manao. A ia'u e noho ana ma ka hale o Mr. Dea. B—loaa iho la wau i ka mai kuni, (fever,) a nawaliwali loa wau, a ane hiki ole ke pane i na ninau a ka poe i hele mai e ike ia'u. Elima pule o ko'u mai ana, alaila ike aku la wau i

ka lokomaikai lua ole o ka ohana o Mr. Dea. B—— ia'u. Oluolu no hoi ke Kauka, he kaka haipule no, he pinepine ko maua haipule pu ana, oiai wau ma ko'u wahi moe e waiho ana i ka mai.

“I kekahi la, ninau mai la o Mrs. B—— ia'u i ko'u makemake i ka make a i ka haalele i keia ao ino a komo aku i ke ao maikai. Pane aku la wau, aole a'u hana aku, aia wale no i ke Akua ia wahi. A pane hou mai la ua wahine nei ia'u, “ua hoomaopopo no anei oe i ka lokomaikai a me ka nani o ke Akua maluna ou?” Pane aku la au, “ae, no ka mea, aole o'u makuakane, aole makuahine, aole he mau hoahanau ma keia aina malihini, o ke Akua wale no. Aka ea! he kuponono anei ia'u ke kapa aku ia ia he makua nou? “O ka mea hana i kona makemake, oia ke keiki a ke Akua.”

“A i ke ola ana o kuu mai, o ka lana loa mai la no ia o ko'u manao, i ka pono o ke Akua. O ka'u hoomanao wale no i ka pomai-kai o kela ao a me ke ola mau. Aka ina e pau iki no ia'u ka hoomanao ana, o ka hoi hope iho la no ia o kuu naau ino nei. Aka ma ka nui o ka manawa, ua loa no ka po-

maikai ma ko'u wa e pule malu ai, a i na wa e kamailio ai me kahi poe. A ke manao nei wau ua ano hou kuu naau, ke ole nae au e kuhihewa. "No ka mea, o Iesu Kristo ka mea nui loa iwaena o na tausani he umi, e aloha ana; a o kona lokomaikai lua ole kai haawaiia mai i ka mea lawehala e like me a'u nei."

Kokoke i ka hooilo, haalele o Heneri i Holisa a hoi i Anedovera, a noho malaila a pau ka hooilo; alaila hoi hou i kona "home" i ka hale o Mr. Mila ma Torinifoda.

MOKUNA IV.

KA MIHI ANA IA KRISTO IMUA O KA LEHU-
LEHU—HOOKAAWALEIA NO KA HANA MISI-
ONARI.

IA Opukahaiia e noho ana ma kahi o Mr. Mila, hele no oia ma Litepila, (Litchfield,) e ike i kona makamaka o kinohi o ka hiki ana i Nu Havena. I kona halawai pu ana me kona makamaka, a kamailio pu ma na mea haipule; a he mea haohao loa ia i kona makamaka i ka ike ana i kona manao ma ia mau mea. I na ninau i haawiiaku ia ia, ua pane mai no oia ma na haina kupono. Eia ka ninau i haawiiaku ia ia, "Pehea kou naau i kau ike?" I mai la oia, "*He eleele, eleele loa.*" "Ua loa ia oe ka naau hou i keia wa, pehea la ke ano o kou naau i kau ike ana mamua'ku o ke ano hou ana?" I mai la oia, "He lepo, aole lepo a koe aku."

A o kana kamailio ana a pau ma ia wa, ua pili nui no na manao haipule, a i kona nana, ina he Kristiano opio loa oia e hana i na manao lani. I mai la oia, "I kuu wa i Tori-

nifoda—ma ke kula oki palaoa, hana wau malaila me kuu kino, aka o kuu manaō, i ka lani no, a nolaila, ua pomaikai.”

A ua makaukau loa oia ma ka Palapala Hemolele. Hiki ia ia ke hai mai i na pauku i hookaawaleia i kela kamailio ana keia kamailio ana. No ia mea, ua akaka loa, ua kukuuia kona manaō maluna o ka oiaio o ka Baibala. He nui na kumu manaō e ninau ai, “Heaha ke ano o ko kakou Hoola?” Eia kana, “I kona i ana mai, ma ka hale o ko’u makua, he nui wale na wahi e noho ai; ina aole pela, ina ua hai aku au ia oukou, ke hele nei wau e hoomakaukau i wahi no oukou.” “Heaha ke ano?” “E hele ana wau e hoomakaukau i wahi no oukou.”

A no kona makaukau i na pauku o ka Palapala Hemolele, ua lilo oia i mea nui i ka poe e kamailio pu ana me ia. I kekahi hele ana ona e ike i kona makamaka, nonoi aku la oia e hele aku e noho pu me ia ma kona aoao, e hai aku i kekahi mea ano nui ana i manaō ai e hai aku. Eia no ia, e kamailio no ka holo i Hawaii nei, e hai i ka olelo a ke Akua. Aole nae i ae ia mai, no ke ano hopohopo i ke ao ana i ka olelo a ke Akua i ka

poe naaupo, i aku la oia, Ua ike no oe i ka olelo ana mai a ko kakou Hoola. "O ka mea malama i kona ola, e lilo no ia, a o ka mea haalele i kona ola no'u, e loa ia ia ke ola."

A mahope mai, ua hoike hou no oia i keia manao aa ona imua o kahi kahunapule kahi-ko; a ninau mai la ua kahuna nei i ke kumu o kona manao e hoi hou ai i Hawaii. Pane aku la oia, "E aʻo i ka olelo a ke Akua i ko'u lahui." A nonoia mai la oia e hai aku i ke ano a na akua kii, pane aku la oia, "Aole." I aku la ke kahuna. "Ina paha e lohe kou lahui, he mea e hoohewa ana ka olelo a ke Akua i ko lakou akua, pepehiia paha oe a make?" "Ina o ka makemake ia o ke Akua, alaila, ua makaukau loa wau."

"I ka hooilo o ka makahiki 1813, koi ia oia e James Morris, Esq., o Litepila, e noho me ia ia hooilo a pau, i hele i ke kulā ao pili olelo. Malaila ko Opukahaia wahi i ao ai i ka pili olelo Beritania, i ka hoikehonua, a me ka helukakau; a ua holo no kona ike ia hooilo. A i ka makahiki 1814, hoi hou oia me Mr. Mila, a noho mahiai no.

A i ka halawai makahiki ana o ka Ahaelele Akau o Litepila, hookomoia o Opukahaia i

haumana no ua Aha la, a na lakou e malama. A ua koho ua Aha la i mau komite ekolu, na lakou e nana kona ike a naauao, alaila, hoike aku i ka halawai makahiki o ka Aha.

“Mahope mai o ka lilo ana o Heneri na ua Aha nei e malama, ua hana no oia e like me ke kauoha a na komite, pela no hoi i hana mau mai ai kona mau makamaka Kristiano ma na mea kupono. A manao no hoi oia e hana lima i kahi mau hora o ka la, a me ka lele hou aku i wahi hou e noho ai. A ua komo loa ae ke akaka lea o kona manao Kristiano iloko o ka poe e manao nui ana ia ia. Loaa ia ia ka manao ikaika i ka heluhelu i ka Baibala, he kakaikahi loa kona wa e kaawale iki ai mai ka heluhelu ana i ka Baibala. I kekahi wa, ina e noia mai oia e pule, pule no ma na halawai; a hana mau no i na hana i haawiia mai ia ia, a no ia mea, ua manaoio loa ia oia e ka lehulehu.”

I ke kau o ka makahiki 1814, hele o Heneri i Torinifoda. A i mai la oia penei: “I ka hoomaka ana o ke kau, hoi mai la kuu makamaka a’u i aloha loa’i, oia hoi o Mr. Mila, mai kona hele kaapuni ana e nana i na Ekalesia o kela wahi keia wahi. Ua uwe aloha

maua. I kekahi wa, ia'u e waele ana i ke hulina, ninau mai la o Mr. Mila ia'u, pehea kou naau hewa i keia wa? Aka nae, hopo-hopo wau i ka hai aku i ke ano hou a me ka ole.

Ma ia wa, manao iho la o Mr. Mila e hoi-hoi ia'u me Rev. Mr. Hareve, (Harvey,) o Gosena, (Goshen.) A he mea oluolu loa no ia ia'u, a hoi aku la wau me ia e noho ai, a aoia wau i ka hoikehonua a me ka helukakau; a i kahi hapa o ka manawa, hoao wau i ka unuhi i kahi mau pauku o ka Baibala mai ka olelo Beritania a iloko o ka olelo Hawaii. I kekahi manawa, lilo au i ka hana i buke aosepela, i hoakakaolelo, a me ka pilirolelo, a me ia mea'ku.

“Oiai wau e noho ana maanei me Rev. Mr. Hareve, ua loa nui mai ia'u ka pomai-kai maluna o ko'u mau kukuli ana i oi aku i ko ka wa mamua'ku nei, he keena maikai e hoopaanaau ai ka haawina, a o wau wale no i ka hapa nui o ka manawa. I ko'u wa e hoi ai ma ko'u wahi moe, kipa nui mai na manao maikai.

“A moakaka loa ia'u na mea a pau ma ka noonoo ana. E kono mau ana ka hoomanao

ana i ka Haku iloko o'u, i kela manawa keia manawa. Kuhi wau i ka manaoio haipule he mea paakiki la i ka imi ana i ka wa mamua, eia ka aole, hookahi wale no mea e paakiki ai, o ka hewa wale no o ka naau.

“Ua loihi kuu imi ana i ka Haku Iesu, aole nae i loaa. O ke kumu o ia loaa ole ana, aole wau i imi pono. Aka hoi, i keia wa, ke manao nei wau, ua loaa ia'u ma ko'u mau kukuli ana. *Aole ka Haku iloko o ka makani ikaika, aole hoi iloko o ke kamumu, aole hoi iloko ke ahi, AKA HOI, aia oia iloko o ke ahe-ahe malie.*”

“I keia wa, manao iho la wau iloko iho o'u, e komo iloko o ka ekalesia. Makemake iho la au e haalele i na mea a pau no ka hoonani ana i ke Akua, a e haawi lilo aku i ko'u naau a pau ia ia, nana e hana mai ia'u e like me kona makemake.

“Hoike aku la au i keia mau mea ia Rev. Mr. Hareve, a manao mai la oia, ua oi kuu pono e lawe i ka inoa hoahanau. Makemake mai la oia ia'u e hele a halawai pu me Rev. Mr. Mila, a me na hoalauha a'u i ike ai, a e kukakuka pu me lakou no keia mea; no ka mea, ua iini loa wau. Nolaila, hele aku la

au a kamailio pu me kuu makamaka a maku-
 akané aloha, o Mila, no keia manao o'u. A
 ua maikai wale no ia i kona manao. Make-
 make oia e hele mai i kela Sabati aku no ka
 ninaninauia. Noho iho la au ma Gosena a
 kokoke i ke Sabati i hoomaopopoia, alaila,
 hele aku la au i Torinifoda. A i kuu hele
 ana ma ke alanui, manao iho la wau me he
 mea la e hele ana wau i kuu *home*, i ka Ieru-
 salema hou, i ka ipuka pomaikai. Naue aku
 la au me ka hoomanao i keia mau huaolelo,
 "Owai la ko'u mea ma ka lani? Aohe hoi
 he mea ma ka honua nei a'u e makemake nei
 mamua ou." (Halelu 73:25.)

"Ua hookomoia wau iloko o ka ekalesia o
 Kristo ma Torinifoda, i ka la 9 o Aperila,
 M. H. 1815. Eia ke poo o ka olelo a Rev.
 Mr. Mila i hai ai i kela la: "A e kai aku no
 au i ka poe makapo ma ke ala a lakou i ike
 ole ai; e alakai no au ia lakou ma na kuamoo
 a lakou i ike ole ai." (Isa. 42:16.)

Mamua iho o ka manawa i hoomaopopoia
 no ka hookomo ana ia Opukahaiia iloko o ka
 ekalesia, ua nonoi oia ia Mr. Mila, e ae mai
 ia ia, ina ia he mea kupono i kona manao, e
 hoopuka aku oia i kekahi mau olelo imua o

ke anaina i kona wa e hookomoia'i iloko o ka ekalesia. Ua ae oluolu no o Mr. Mila i keia noi, aka, no ka lilo o kona manao ma ka mea e i ka manawa o ka hana, poina oia, a nolaila, loa ole ia Heneri kona manawa e olelo ai imua o ke anaina. A i ka pau ana o ka halawai, hoi aku la o Mr. Mila i kona keena palapala, a hele aku la o Heneri me ka naau kaumaha, i aku la, "You no let me speak, sir—I sorry." Eia ke ano o ua huaolelo la, "Aole oe i waiho mai i kekahi olelo ia'u—Kaumaha wau." Minamina iho la o Mr. Mila no kona palaka ana. Ninau aku la oia, "Heaha ka olelo au i makemake ai e hoopuka aku, e Heneri?" Pane mai la oia, "Make-make au e ninau aku ia lakou, heaha ka lakou mea e kakali nei? Ke noho nei lakou ma ka aina Euanelio—ua lohe lakou no ke ola, ua makaukau ke Akua, ua makaukau o Kristo—no ke aha la lakou e huli ole ai a hahai mai hoi ia Kristo?"

Ua lilo o Heneri i lala no ka ekalesia ma Torinifoda, aka, ua hoomau no nae i kona noho ana me Rev. Mr. Hareve, ma Gosena. "Maanei," wahi ana, "ua noho au hookahi makahiki a oi ae, a ua malamaia wau me ka

lokomaikai a me ke aloha nui loa. I keia manawa, ua lilo wau malalo o ka Ahahui Misionari ma Bosetona, me ka manao e hoomakaukau ia'u i misionari e hele aku i kuu lahuikanaka pono, e noho la ma ka aina a me ka malu o ka make, aole hoi lakou i ike i ke Akua oiaio, a ua naaupo lakou i na mea o kela ao aku—aohe a lakou Baibala e helu helu ai—aohe o lakou Sabati—a he mea ike ole ia e lakou keia mau mea a pau. Ua aloha au ia lakou, a ua manao no au e hoolilo i ke koena o kuu mau la no ka hana a ko kakou Hoola Kamahao, ina e hooloihi ka Mea Manaloa i kuu ola. Iwaena o ka po, ua aloha pinepine au i kuu lahui no ka make ana o ko lakou mau uhane, a pinepine kuu makemake e ku koke aku imua o lakou me ke kakali ole aku i ka hoomakaukau pono ana; no ka mea, ua nui ka iini e ike ia lakou. Ina paha aua nei e hoopakele mai ka Haku ia lakou mai ka wela lapalapa mau loa! a e lilo hoi ia i Akua no lakou, a o lakou kona poe—i loa hoi ia lakou, “ka pono e ili mai ana i ka poe haipule i ke ao.” Me e kuu pomaikai i keia manawa, oiai kuu mau makamaka, a me kuu ohana a pau malaila e make ana i ka pololi

a me ka makewai, no ka nele i ka lokomaikai o ka Haku, a me ka loa ole o ka wai no loko o ka punawai o ke Ola. Ina hoi e nohò mai ka Haku Iesu iloko o kuu naau, a e hoo-makaukau mai ia'u e hele aku a e noho iwa-ena o lakou a pau ke koena o kuu mau la. Aka, aole o ko'u makemake, o kau no, e ka Haku, ke hookoia. Na'u ia e noho pu me lakou me he mea la mai kahi e mai, a he malihini hele no hoi ma ka honua nei a pau ko'u ola ana; a e hoolilo loa ia hoi ma ka oihana a ka Mea hoola. Na ka Haku e koku-mai ia'u e noho me ka makau aku ia ia, a e hooko i kona makemake, a e lilo no hoi i kauwa nana."

Pela na wahi manao o Opukahaia i kakau iho ai, e pili ana ia ia iho, a i kona manao e lilo oia i misionari e hai aku i ka Euanelio a ka Haku i ua lahuikanaka naaupo nei o Hawaii.

MOKUNA V.

KONA HOOMAKAUKAU ANA NO KA OIHANA
MISIONARI.

UA noho o Opukahaiia ma Gosenā, me Rev. Mr. Hareve, mahope aku o ka manawa i oleloia maluna, mai ka malama o Aperila 1815, a hiki i ka malama o Okatoba oia makahiki no. Iloko oia Okatoba, haalele oia ia Gosenā, a hele aku la i Kanaana, malaila oia i noho ai iwaena o ka ohana o Rev. Mr. Perenetike. Malaila oia i kakau iho ai i keia moolelo nona iho a kakou e ike nei. Na kana kumu Rev. Mr. Perenetike, i paipai i kona manao e kakau i ua moolelo nei. Kakau lii-lii oia i kela la keia la a paa, a oki no malaila. O ke koena o kona moolelo, na hai ke kakau ana.

Ua noho oia ma Kanaana, me Rev. Mr. Perenetike, mai ka malama o Okatoba 1815, a hala ke kau o 1816. Ia manawa, ua hoo-komoia oia iloko o ke Kula Misionari no na Aina e, i kukuluia ma ke kulanakauhale i kapaia o "Na Mahinaai Hema," (South Farms.)

Noho iho la ia malaila, a kokoke i ka pau ana o ka makahiki 1816. Ia manawa, hele aku la oia a i Ameheseta, (Amherst,) ma Masekusetā, i hoā hele no Rev. Mr. Perekina, he elele paipai na ka Ahahui Misionari ma Bōsetona, e hoomakaukau ana oia e ka ahele ma kela aoao o ka aina, e paipai i kolaila poe e kokua lakou i ke ola o ua Kula Misionari nei. A o ka hele pu ana o Opukahaia me ia, ua lilo ia i mea e holo pono ai ia hana. Mahuahua mai na kokua. Haawi nui no ka poe haawi, a o kekahi poe haawi ole mamua, ua haawi oluolu lakou i keia hele pu ana a Opukahaia.

Eia ka Mr. Perekina i hai mai ai no kona ike ana ia Opukahaia i kela kaahēle ana a laua. Wahi ana, "Ua aloha nui ia oia e ka poe a pau o keia mau wahi i ike ia ia. Kakaikahi loā na mea a'u i ike ai e like me Opukahaia ka minamina nui ana, a me ka malama pono ana i ka manāwa. O na hora e hoomāha ai ka nui o kanaka, he mau hora hana no ia ia. I kona wa mehameha, ua mau no kona huli ikaika ana i na buke naauao. A i ka wa e launa ai me kanaka, o ka naauao no kana' mea i imi nui ai; a ina i ku

ole ka lakou kamailio ana i kona manao, wehe ae la oia i kana buke Kauoha Hou, a heluhelu iho la, a i ole ia, hoi okoa no i kona keena e huli ai i na buke.

“I kekahi ahiahi, ua akoakoa mai kekahi mau hoaaloha, a hawanawana mai la oia ia’u, “Minamina i ka manawa, eia kekahi mau uhane e haele ana i kela ao, kupono keia manawa e paipai aku ia lakou.” A mamua o ko lakou hoi ana i ko lakou mau wahi, paipai no oia i kekahi mau mea elua o laua ma na mea o ka uhane.

“Eia kekahi mea i ikeia; o kona ano haahaa o ka naau. I ko maua kaahela ana ma kela kulanakauhale keia kulanakauhale, mamuli no hoi o ka makemake o na kanaka e lohe ia ia, ua haawi pinepine au ia ia e olelo imua o lakou ma na mea o ka pono. Pili pono kana olelo ana; koikoi no hoi, a me ka lealea o na pepeiao i ka hoolohe aku. A nolaila, nui na olelo mahalo a kanaka i haawi mai ai ia ia; aole nae i lilo ia mau mea i kumu e hookiekie ai oia, aka, ua mau no kona ano haahaa, a me ka hopohopo ia ia iho.

“Eia kekahi mea i ikeia ai kona ano haahaa. I ko maua kaahela ana, ua hiki aku

maua i kekahi kulanakauhale, a i ka pau ana o ka halawai misionari malaila, ku mai la ke kahu o kela Ekalesia, a hoakaka mai i ka halawai ma ke ahiahi poeleele o ia la. A ahiahi ae, kokoke i ka manawa i hoomaopopopia no ka halawai, iia'ku o Opukahaiia e manaoia'na ia ia kekahi mau olelo o ia halawai. Hoole mai la oia me ke ano haalulu. Koi hou ia oia e olelo, i mai la oia he wahi pegana naaupo wau, aole i lawa kuu wahi ike e ao aku ai i ka poe e noho ana ma ka aina Kristiano; a noi mai la oia ia'u e hookuu ae ia ia no ka olelo ana. I aku la au ia ia, o kuu manao no, he hana no ia i haawiia mai ia ia e hana. Ua kokua lokomaikai mai kolaila poe, ua nui hoi ko lakou makemake e lohe i kona leo ma na mea o ka pono. Ua holo pono hoi kana mau olelo ma na wahi e ae, a malia paha e lilo kana olelo i mea e ola'i kekahi uhae o lakou. Mahope iho, i ko makou hele ana i ka halepule, no kuu ike ana ua nui kona hopohopo, noi aku la au ia Rev. Mr. B—— e paipai aku ia ia, a hoolana i kona manao. Nui na mea i oleloia'ku e hoolana'i i kona manao, aka aole i pau iki kona ano makau a me ka hopohopo. A hiki

makou i ka puka o ka halepule, huli hou mai la ia ia'u, i mai la, ke noi aku nei au ia oe e hookuu ia'u no ka olelo ana, aohe a'u mea e olelo aku ai. E aho no nau e hai aku i ka olelo, he oi aku kā pono malaila. I aku la au ia ia, aole e hiki, no ka mea, ua paa ka manao o ke anaina e lohe ia ia. Aka, oi hiki aku no i ka manawa kupono, kaheaia ana oia e olelo aku imua o ke anaina. Ku mai la no ia a hai i ka olelo me ke kupono no e like me ka mea mau ia ia. I ka pau ana o ka halāwai, hoi pu aku la maua, kahe nui ae la kona mau waimaka. Maopopo ae la ia'u ke kumu o kona kaumaha. Hoao no hoi au e hooluolu i kona manao, aole nae i hiki. A ike ae Mr. B—— hoao iho la oia e hoomaha i kona naau, a hiki ole no hoi. Pela no a hiki i ka hale kahi e moe ai ia po. Alaila, hai aku la au i ka poe o ka hale, i ke kumu o kona kaumaha. Hoao no hoi makou a pau e hoolana hou ia ia; a liuliu loa, puka mai la kona leo, 'he wahi lawehala pono ole au—me he mea la ua lilo i ka make.' Alaila, pau iho la kona kaumaha, a kamailio oluolu mai no e like me mamua.

“O ka Baibala kona hoa hele mau. He

mea mau ia ia ka lawe iloko o kona pakeke i kekahi Kauoha Hou i haawiiia ia ia e kekahi makamaka aloha i hele aku nei i na aina Pegana ma ka oihana misionari. I kekahi manawa, ua hele aku o Opukahaia e ike i kekahi o kona lahui, he umi paha mile ka loihi o kahi i hele aku ai. I ka hookomo ana nae i kona aahu no ka hele ana, ua poina oia i kona Kauoha Hou. A i kona hoi ana mai, i mai la oia ia'u, me ka maka oluolu, maluhia ole ka hele ana o ka makapo, ke nele kona kookoo."

Pela iho na wahi olelo a Rev. Mr. Perekina, no kona ike ana ia Opukahaia i kela kahele ana a laua.

Noho aku la o Opukahaia ma Ameheseta mahope iho o keia kahele ana, a hiki i ka Aperila o ka makahiki 1817, alaila hoi aku la i ke kula misionari ma "Nakihapai-Hema." (South Farms.) Malaila oia i noho ai me kona mau hoa o ka lahui Hawaii, (o Hopu ma, a o Honolii, George Kaumualii,) a i na la mua o Mei. Alaila ua hooneeia aku ke kula i ke kulanahauhale o Konewale, (Cornwall.)

I keia manawa, ua paa loa kona manao e

hoomakaukau koke oia me kona ikaika a pau no ka hai ana i ka Euanelio. Lilo nui kona manao ma ka oihana haiolelo, a ua hoopuka pinepine hoi i kona mau manao no ka hooponopono ana i na kumumanao o na haiiao, a me ke ano o ka hai ana i ka olelo.

Eia kekahi o kona mau manao no kekahi hemahema o kekahi poe i ko lakou hai ana i ka olelo. Hoahewa oia i ka hana a kekahi poe haiolelo e hai ana ma na huaolelo naauao a hohonu loa, a pohihihi hoi i ka nui o ka poe e lohe ana. Wahi ana, he nui wale na ano o ka poe lohe. He poe naaupo ka nui, hapa wale no ka poe i maa i na huaolelo ano e o ka naauao hohonu. Nolaila, ina e hai ana na haiolelo imua o kanaka o kela ano o keia ano, pono e hai lakou ma na hua i maopopo like ia lakou a pau. E koho lakou i na olelo maopopo lea. Ina aole pela, wahi ana, alaila ua like ka lakou hana me he haiolelo la ma ka olelo e. E maopopo na huaolelo a pau, wahi ana, no ka mea, aole hiki i na kanaka ke lawe i na buke kuhikuhi huaolelo, (dictionary,) i ka halawai.

Noho aku la o Opukahaiia ma ke Kula Missionari ma Konewale, a pau kela makahiki

1817, a i ka hoomaka ana o ka makahiki 1818, loa ia ia ke ano omainai loa e pono ole ai kona imi ana ma na buke o ka naauao. Kiiia ke kahuna lapaau, a nanaia ke ano o kona mai. Ikeia he wela kona mai; he wela ano paakiki loa no, (typhus fever,) a hoomakaia ka hanai ana i ka laau kupono no kela mai. I ka lua hoi o ka hebedoma o ka lapaauia ana, ua oluolu no kona mai, a ua lana loa ko lakou manao e ola loa ana. Aka, mahope iho, ua maopopo ka emi mau ana o kona ikaika, a me ka hemo ole aku o kona mai; no ka mea, ua puni loa kona kino i ua mai nei, a ua hoopaa loa aku hoi ka mai ma na kumu o kona ola. Hana aku no ke kahuna lapaau me kona akamai a pau loa, me ke kuka pu no hoi me na kahuna lapaau e ae. Kiai mau mai no hoi na makamaka aloha, me ka malama pono loa i ka mea mai, aka, hiki ole ia lakou, nolaila, make aku la o Opukaia ma ka po o ka la 17 o Feberuari 1818. Kuuia kona uhane lanakila, a loa ia ia ka iini nui o kona naau, e hoi koke aku oia i ka Hale o kona Makua ma ka Lani.

I kona wa e waiho ana i ka mai, ma ka hale no ia o Rev. Timoteo Pohaku, (Timothy

Stone,) ke Kahu Ekalesia o ka Ekalesia Hema, o Konewale. Nui ka aie o Opukahaiia a me kona mau hoa o ke kula i kela ohana, no ko lakou lokomaikai, i ko lakou ao haipule ana, a me ko lakou alakai maikai ana ma ka pono. He poe makamaka aloha loa lakou, a malama loa hoi i kela Kula Misionari.

I kona waiho liuliu ana i keia mai hope, ua hoomaopopo lea ia ke ano haipule io o Opukahaiia. O kona ahonui, manaolana, a me ka ae oluolu aku i ka manao o ke Akua; o kona aloha i na makamaka no ko lakou mau lokomaikai, a me kona manao aloha i kanaka a pau, oia na mea i ikeia, a i olelo pinepine ia e ka poe i launa me ia iloko oia wa. I iho la ke kahuna lapaau, "akahi no ia a ike i ka mea i loa i keia mai wela a loihi hoi, i ike ole ia kekahi ano paupauaho o ka manao, a huhu wale paha i kekahi manawa."

Olelo iho la o Pohaku wahine, (Mrs. Stone,) ka mea i malama ia ia me he makuahine pono la, mai ka hoomaka ana o kona mai, a hiki i kona make ana, olelo iho la ia, "o kekahi no ia o na wa pomaikai loa, a me ka waiwai loa o ko'u ola ana. O ko'u luhi ana, a me ka malama ana ia ia i ke ao a me ka

po, ua ukuia¹ mai, a oi loa aku, ma ko'u ike ana i kona ano maikai, a me ka lohe ana no hoi i kona kamailio haipule."

Na ua wahi makuahine aloha nei no i kakau iho a paa ma ka pepa kekahi mau olelo a Opukahaia iloko o na la hope o kona mai ana.

I kekahi kakahiaka, he po pilikia loa hoi ka i hala aku, komo mai la o Kaumualii kekahi o kona mau hoa o ka lahui Hawaii e ike ia ia. I aku la nae o Opukahaia, "kokoke loa wau e make i ka po nei. He mea maikai ka loa ana i ka mai, Sandwich, (oia hoi kekahi inoa haole o Kaumualii.) E make ana kakou a pau, a he mea ole kahi e make ai." Ninau aku la kekahi ia ia, "Makau anei oe i ka make?" Pane mai la oia, "Aole, aole no." I aku la kekahi makamaka ia ia, "kau-maha wau nou, i kou mai ikaika loa." Pane mai la no oia, "E hana no ke Akua e like me kona makemake."

Pinepine ko Mrs. Stone ninau ana ia ia ina ua makaukau paha ia e lohe i kekahi mau pauku o ka Baibala. Ae mai la kela, "Ae, maikai." A pau ka heluhelu ana, haliu kona mau maka i luna, e pule ana paha iloko o

kona naau. I kekahi manawa, hala iki kekahi manawa pilikia loa, poha mai la kona leo, "Ina e paulele aku kakou i ke Akua, aohe mea e makau ai." He mea pinepine no ia ia, ka wa maha iki o ka eha, e noi aku e pule kekahi o lakou nona. I kekahi mau manawa, ua hoi koke mai no kona eha, a hiki ole. O kana mea i kahea pinepine ai e pule, oia no o Hopu. Pinepine ko laua pule pu ana—he hana no hoi i maa ia laua i na makahiki mamua aku. I ka nana aku, ua hui pu laua iloko o ke aloha hookahi e like me Davida laua hoi o Ionatana. Ina e pule pu laua, a pau ka pule ana, o ka oluolu no ia, a me ka hauoli o Heneri. I kekahi manawa, wahi a Mrs. Stone, maule iho la o Opukahaiia, a kii aku la au i wai ma kekahi keena ae, a i ko'u hoi ana mai, loa laua ia'u e uwe pu ana, no ko laua manao ua hiki mai ka manawa o ko laua kaawale ana.

MOKUNA VI.

NA LA HOPE O KONA OLA ANA, A ME KONA
MAKE ANA.

NINAU ae la oia i kekahi manawa no ke kahuna lapaau, no ka mea, ua nui kona aloha i ua kahuna nei. I aku la hoi o Mrs. Stone ia ia, "e Heneri, ke paulele nei anei oe i kou kahuna lapaau?" A pane mai la hoi oia, "He mea ike ole ia ia oe, kuu paulele nui ana i ke Kahuna Lapaau nui o ka uhane." Ninau no hoi oia, "Pehea, ke olelo nei anei ke kahuna lapaau e ola ana ko'u mai?" Hai-ia aku la no hoi ia ia, "Ua kanalua kona manao." Alaila, i iho la o Opukahaia, "E hana ana no ke Akua i ka mea pono; a na ke Akua no hoi e malama mai ia'u." I kekahi kakahiaka, i aku la oia ia Mrs. Stone, "He kakahiaka oluolu maikai keia." I aku la hoi oia nei ia ia, "Ua olioli paha oe e ike i ka malamalama o keia kakahiaka, oiai ua hala aku la ka po pouli me ka ehaeha nui?" Pane mai la o Opukahaia, "He wahi malamalama

no hoi iwaena o ka po; he wahi malamalama o ke Akua.”

Hala aku la kekahi mau hora elua i nui loa ai ka pilikia, a me ke aumeume ana o ka eha, a maha iki ae la oia, olioli loa oia la i ka nana aku, huli ae la kona mau maka e nana aku iwaho o ka pukaaniani; ikea aku la kona mau maka, me he mea la e haka pono ana i kekahi mea maikai ano e. Ninauia aku la, “Heaha kau e hoomanao nei, e Heneri?” I mai la oia, “Aole e hiki ia’u ke kuupau loa aku ma ka olelo. E hoomanao ana wau no Iesu Kristo.”

Hiamoe ae la oia a liuliu, ala mai ana, pule ikaika loa oia penei, “E ka Haku, e lokomai-kai aloha mai oe i kuu uhane; ua ike no oe i ko’u mau hewa huna a pau; e hoola mai ia’u no ke aloha o Iesu Kristo ko kakou Haku, a me ka Hoola. Amene.”

Ua malama loa kekahi o kona mau hoa ia ia, (oia hoi o Wiliama Kenui,) i kona wa mai. I aku la oia ia Kenui, “Ina e komo ole ka ai, aole au e ola.” Alaila, ninau aku la, “Ua paina anei oe i keia kakahiaka, e Wiliama? Pono e hauoli nui oe i ka mau ana o kou ikaika e pono ai ke komo ana o ka ai.”

Mahope iho, hapai ae la oia i kona mau lima iluna, i iho la, "Nui loa ko'u iini e ike hou ia Hawaii! Aka, ke manao nei nae wau, aole loa wau e ike aku; e hana ana ke Akua i ka pololei, ua ike no oia i ka mea pono," a hu ae la na wai halana o kona uwe ana. "E Wiliama," wahi ana, "ina e hoi ola aku oe, e hai aku oe i ko'u makuakane hoahanau," (oia hoi ka hoahanau o kona makuakane pono, ka mea nana i malama ia ia i kona wa kama-lii ma Napoopoo.)

I aku la oia i kekahi makamaka aloha, "Lilo ka nui o ka manawa i ka hoomanao ana i ka nui o ko ke Akua lokomaikai mai ia'u, a me kona aloha." Iia ae la no hoi no kona mau hoa Hawaii, i ko lakou aloha nona. Pane mai la oia, "Ua lokomaikai loa mai lakou a pau; nui loa no ko lakou hana aloha mai ia'u; aka, e pono ia lakou e imi i ka pomaikai no lakou iho no hoi."

Ua nui kona aloha i na makamaka a pau, aka, ua oi aku i kona mau hoa Hawaii. Ake no oia e noho mau mai kekahi o lakou me ia, a ina paha ua nalowale aku lakou i kona maka i kekahi manawa, kahea ikaika oia ia lakou, aole hoi oluolu iki o kona manao, aia

no a haiia mai, ua hele iki lakou e paina paha, a e hoomaha paha.

I aku la ia i kekahi o lakou, “W——, (Kenui paha?) Aloha no wau ia oe no kau mau hana lokomaikai mai ia’u; ua nui loa no kau i hana mai ai; aka, aole i nui ka hana i koe; aole au e ola.” A i kekahi ae, “E kuu hoa aloha, G——, (Kaumualii paha?) Ua nui kou lokomaikai ia’u. Hoomānao pinepine au ia oe. Aloha no wau ia oe, aka, o ka make no koe ia’u; a pela no hoi au ia oe. E hoomānao i ke Akua, e G——, mai palaka.” A i kekahi ae; “E noho mai ana oe i hope nei; malia paha e hele e aku au i keia awakea. Nani ka nui o ko ke Akua lokomaikai ia kaua.”

I ka la mamua iho o kona la i make ai, ua hala aku ka po me ka nui loa o ka pilikia, a me ke ano olalau o ka noonoo, aka, i ke kakaikiaka ana ae, ua hoi mai kona ike, me ka hoomaopopo ana o kona noonoo; a nonoi ae la oia, e kaheia kona mau hoa Hawaii. A komo mai la lakou, ninau aku la oia no kekahi o lakou i hiki ole mai, a i lana ole ai no hoi kona manao nona. I iho la oia, “Aole au i ike nui aku ia ia: aole paha wau e ike

ana ia ia; makemake nae wau e kamaio aku ia ia. Nononoho mai la ua mau hoa nei a puni kona moe, a olelo aku ia ia lakou ma ka olelo Hawaii, me ka iini nui o kona naau, a me ka hoomanawanui ana i kona nawaliwali. Ua kakauia ka nui oia mau olelo e kekahi o lakou mahope mai, e like me na hua i paanaau ia ia o kona lohe ana. Penei no ua mau hua la, "E kuu mau hoa aloha o ka lahui hookahi, he wahi olelo ka'u no oukou a pau; ua lokomaikai mai oukou ia'u, a ua nui ko'u aie ia oukou malaila; aloha nui au ia oukou. Ano hoi, e kuu mau hoa aloha, ke nonoi nei au ia oukou, e hoomanao oukou, he pokole wale no ka manawa i koe, a halawai mai oukou ma keia ala a'u e hele nei. O ka mea i oi aku mamua o na mea e ae a pau loa, o ko oukou hoolaulea ana i ke Akua. E imi oukou a loa o Kristo i makamaka no oukou. Eia oukou ma ka aina malihini nei, aohe makuakane, aohe makuahine nana e malama mai i ka wa mai. Aka, e malama mai no ke Akua ke paulele aku oukou ia ia. Ua paa loa ko'u manaoio i ke Akua; ua makaukau wau e make ke kahea mai ka leo o ko'u Hoola. He oluolu no e hele aku, ke manao mai

ke Akua e lawe ia'u. Aka, aole au e oluolu i ka haalele ana ia oukou, ke ole ko'u kahea mau ana i ka lokomaikai o ke Akua, e hoomaemae i ko oukou mau uhane, a e hoomakaukau ia oukou no ka Lani. Aia a halawai pu kakou malaila, aole e kaawale hou. E hoomanao, e ko'u mau hoa aloha, he poe nele oukou, ma ka lokomaikai o ke Akua i loa ai ia oukou na lole aahu kupono, a i malama maikai ia mai ko oukou ola. Pono hoi e aloha aku oukou i ke Akua; makemake au e hoolaulea aku oukou i ke Akua. Aole anei oukou i ike i ka nui o ko ke Akua lokomaikai ia oukou? Nui loa na pomaikai a ke Akua i haawi mai ai ia oukou, a ia'u hoi. E hoomanao no oukou, ina aole oukou e aloha aku i ke Akua, alaila, e make mau loa ana oukou. Ua haawi ke Akua i kana keiki e make no oukou; nui loa ko'u iini ia oukou, i aloha aku oukou i ke Akua. Mamuli paha e kamailio hou au ia oukou, ua pau ko'u ikai-ka, a hiki ole ia'u ke olelo hou i keia manawa; aole nae i pau kuu olelo."

He wahi hapa wale no paha keia o kela olelo ana a Opukahaia. Aole paha i pau loa i ka paanaauia. Aka, ua mana no kana ole-

lo ana. Me ka nawaliwali loa o ke kino, a me ka paupauaho kona ekemu ana. Aka, ma ka lohe ana i kona leo, hu no ke aloha. Noho mai la kona mau hoa, a me kekahi poe makamaka o kela aina, a hoolohe no i kana olelo ana, a oki loa oia no ka paupauaho loa, a uwe nui loa lakou a pau.

Aneane elua hora mahope iho, loa o Opu-
kahaia i ka maha iki, a komo mai la o George
Kaumualii, kekahi o kona mau hoa, (aole nae
ia i hiki mai me na hoa e ae i kela olelo ana
a Opu-kahaia i haia'e maluna,) i aku la o
Opu-kahaia ia ia, "E George, e noho iho. Ua
kamailio iho nei au me na hoa o kaua. Ua
nui loa ko lakou lokomaikai ia'u. Aole e
hiki ia'u ke uku aku ia lakou, aka, aia no i
ka Haku Iesu ka hoolawa ana a koe aku;
aole o ke kala, aole o ka waina, aka, nana no
e uku aku ia lakou. O oe, e Keeki, he keiki
ilihune oe, e like me a'u nei. Aohe ou ma-
kuakane a makuahine maanei. Ua hoolako
mai ke Akua ia kaua i na makamaka aloha,
a e pono oe ke aloha aku ia ia, a e hookauwa
aku nana; a, aia a hele aku kakou mai keia
ao aku, e hiki ia kakou ke hoonani aku i ke
Akua, a mau loa aku. E make-ana kākou a

pau. Aole e hiki ia Kauka C——, (Calhoun,) ke hoopakele ae ia kakou ke loa ka mai e make ai. He mau lawehala kua. Na ka Haku Iesu e aloha mai i ko kua mau wahi uhaue. E hoomaha wau.”

Komo mai la hoi kekahi keiki a Rev. Mr. Stone e ike ia ia, nana iki no, a huli aku la e hoi, kahea aku la o Opukahaiia ia ia, “Alia! Alia! He wahi olelo ka’u ia oe. Ua lilo oe i keiki mahuaa ma ke kino, a ua nui loa kou hele ana i ke kula. E hoomanao hoi oe, aia kou manawa hoike i ka la hookolokolo nui mahope, e maopopo ai kou holo ana imua.”

I aku la oia i kekahi makamaka, “Ke mau nei no ko’u manaoio.” A i kekahi ae, “Ahea paha e laweia aku ai au?” Iia mai, “ua kokoke ka manawa.” Ninauia aku oia, “Ina ua waihoia mai ia oe ke koho ana, pehea, e koho paha oe i ke ola? I ka make paha?” Pane mai la oia, “Aole akaka. Makemake no au e ola, i loa na hana o ka pono. I ole ia, aohe no o’u makemake e ola hou aku no ka minute hookahi.”

I kekahi makamaka e ae, olelo aku la ia, “He mea ole ke ola ia’u, ke loa ia’u ka lau-

na ana me ke Akua, a me ka hele ana aku e noho pu me Kristo.”

Nana ae la oia i kona mau wawae, e hoo-maka ana malaila ka maele o ka make, a kahea iho la ia, “E ka make!”

Haawi aku la ke Kauka i kekahi laau inu ana i hoopailua ai, a i mai la hoi oia, “Alia, alia, apopo.” Mahope iho nae, ae aku la me ka olelo iho, “Malia paha, aole he la apopo koe.” I ke ahiahi mamua iho o kona make ana, komo mai la o Rev. Mr. Mila e ike ia ia. Nana pono aku la o Opukahaia ia ia, a i aku la, “E pule paha oe, mamua o kou hele ana?” Pule iho la o Mr. Mila, a hoolohe pono o Opukahaia, a pau ka pule ana, haawi aku i kona aloha me ka leo oluolu loa, a me ka maka hauoli ano e.

A maopopo ua aneane mai ka make a koke loa, ninau aku la o Mrs. Stone, (Pohaku wahine,) “Heneri, ke manao nei oe, o kou make keia?” Pane mai la oia, “Ae;” alaila, i hou iho la, “Aloha au ia oe no kou loko-maikai.” I hou aku la keia, “Makemake no wau e halawai pu kua ma kela ao.” Pane mai la oia, “Ke lana nei ko’u manao no kela halawai ana.” Lalau hoi i kona lima, a ha-

awi aku i kona aloha. Pela no hoi i kekahi makamaka e ae.

Lulu lima oia me kona mau hoa Hawaii, me ka olelo pakahi aku no ia lakou, "Aloha oe."

He mau minute wale no mamua o kona make ana, ninau aku la ke Kauka ia ia, "Pehea oe i keia manawa, Heneri?" Pane mai la oia, "Oluolu loa, aohe mai, aohe eha, me he mea la ua ola." Lanakila loa ka maluhia maikai o kona helehena. Ano maikai iki mai la, a waiho malie me ka oluolu ia mau minute. A no ka manao ole o ka poe kiai i ke kokoke loa mai o kona make, ua noho aku ka nui o lakou e hoopumehana ia lakou iho ma kapuahi, (no ka mea, o ka manawa anu loa ia o kela aina.) Koe nae kekahi o kona mau hoa, e ku ana ma ka aoao o kona wahi moe. Kahea mai ana oia la, "Ua hala o Opukahaia." Akoakoa koke lakou a puni ka moe. Ua hala io no kona uhane. O kona kino kupapau wale no koe. Pela ka make ana o Opukahaia, i ka po o ka la 17 o Februari 1818.

Aka, he haawina nui i aoia mai ia kakou iloko o keia moolelo o kona ola ana, a me

kona make ana. Nolaila, he mea pono ia kakou e ku a nana, i ike i na lolina o keia haawina.

E oluolu mua nae paha na mea heluhelu, ke haiia ke ano o kona helehelenā, me kona kino kanaka e like me ka mea i hoike ia mai e na makamaka ma Amerika, ka poe i ike ia ia.

“O kona nui kino, maluna ae no ia o ka hapa nui o kanaka. Aneane eono kapuai o kona kiekie, a ua kulike no hoi ka nui pui-pui o kona kino a me kona mau lala. O kona helehelenā, ua ano o-o. Ku pololei loa oia, me ka hanohano oluolu maikai o ka hele ana. O kona maka, oia i he kau-maha i kino hou, ua hele a maikai, malamalama, eleu. I ka nana aku i kona mau maka, ua ike ia he ikaika kona noonoo. Aa ke alohilohi o kona mau onohi maka. Lipi-lipi kona ihu, a oioi kona auwae. O kona ili, he ili ohelohelo, a o kona lauoho, he eleele kalole.

“O kona ano he oluolu, aloha, akahai, aole i wikiwiki i ka huhu, aole no hoi i ikeia ke ano hoomauhala iloko ona.

“Nui kona aloha i kona mau hoalauna,

aole no hoi oia i hoopoina i ko lakou loko-
maikai ana mai ia ia.

“Ma kona noonoo, na oi aku kona noiau i
ko ka nui o kanaka ui. Pakela aku kona
noonoo. He naau ike no hoi kona, a me ka
huli ikaika i na mea no a pau i loaʻ hou mai
ia ia, a i waihoia mai imua ona e hoomaopo-
po ai. Nolaila, kupono, a koikoi hoi kona
mau manao ke hoopukaia, a ua lilo oia i ala-
kai, a i poo no kona mau hoa. Ina oia e
hooholo i kekahi mea iwaena o lakou, o ke
oki no ia; ua holo.”

E hookomoia maanei kekahi mau leta a
Opukahaiia i kakau ai, i ike hou ai kakou i
kona makaukau ma ka naauao, a me kona
ano haipule.

Ua nui no na palapala ana i kakau ai i ke-
la makamaka keia makamaka ma kela aina.
Hookahi nae ano nui i ikeia maloko o kana
mau palapala a pau, oia no hoi ke kamailio
ana, a me ka paipai ikaika ana ma na mea e
pili ana i ke ola o na uhane o kanaka. Me
he mea la, aole hiki ia ia ka uumi ana iho i
kona aloha i ke Akua, a me kona menemene
i na uhane o kanaka. Aole nae e hiki ia ka-

kou maanei ke lawe mai i ka hapanui o ua mau palapala la. E ike nae kakou i kekahi mau huna olelo noloko ae olaila.

Palapala aku la oia i kekahi haumana o ke Kulanui, (College,) ma Nu Havene, pe-nei:

“E kuu makamaka, o ke aha ko kakou rula? Aole anei ia o ka olelo a ke Akua, i ikeia iloko o na buke o ke Kauoha Kahiko, a me ke Kauoha Hou? Pela io no. Aka, ua makemake ole kakou e hookaawale aku i na hewa, no ka mea, ua oi aku ko lakou ono mamua o ko ka lokomaikai o ke Akua.

“E ka makamaka aloha, e hoomau kakou ma ka manaolana o ka nani o ko kakou Ho-ola, me ka naau oiaio, e hoomaopopo lea ana i ka manaoio. E pule hooki ole oe no ka mea makua ole, e like me a'u nei. Nani no hoi keia hana kupaianaha, i lawe mai ai ka lima mana o ke Akua ia'u, mai loko mai o kela pouli pegana, kahi i hiki ole aku ai o ka malamalama o ka oiaio o ka Haku. A ma-anei hoi, ua loa ia'u ka inoa o ka Haku, o Iesu, iloko o ka Olelo Hemolele, a ua helu-helu hoi au, ua hookaheia kona koko no na mea he nui; a ke hoomanao nei au i kana

mau olelo pono ana i olelo ai, "E kuu Makua, e kala aku ia lakou, no ka mea, aole lakou i ike i ka lakou e hana nei."

Ma kekahi palapala e ae, i kekahi o kona mau hoa Hawaii e noho ana ma Bosetona, a penei kekahi mau olelo:

"Ke manao nei au me ke kanalua ole, ua ike no paha oe i kekahi poe ma keia aina, ua hiki aku ko lakou mau makahiki i ka umi, a i ka iwakalua, a i ke kanakolu, kanaha, kanalima, a kanaono paha na makahiki, me ko lakou hoomanao ole i ka pono mai kekahi makahiki ae a i kekahi; aka, me ka hoomahuahua mai i ko lakou mau hana hewa i na la a pau o ko lakou ola ana. Aole pono keia; no ka mea, ua olelo ke Akua, "Aole e noho mau loa ana kuu Uhane me kanaka." Aka, eia ka poino, he hoapili aloha loa ka hewa na ke kanaka lawehala. Aole oia e haalele i kona mau hewa, ina no e ukuia mai i na ao-honua he tausani."

Penei hoi kana palapala ana i kekahi kanaka opiopio:

"Pono e hoomanao oe, o ka poe aloha io i ke Akua, aole e nele ka hauoli o ko lakou manao ma na wahi a pau a lakou e noho ai,

ke lilo nui ko lakou hana i ka hoonani ana, a i ke aloha ana aku, a me ka hoolaulea ana ia ia; aka, o ka poe hana ole pela, aole o lakou kuleana e manao aku ai i ka oluolu o ko lakou noho ana. Ma na wahi a pau loa a kakou e noho ai, he nui ka kakou e hana ai no ke Akua. O ko kakou hana mua, oia ka hooponopono ana i na manao o loko. Pono e noonoo nui kakou i ka mea Mana, a Hemolele hoi, nana i hana kakou nei; e hoomanao i kona ano hemolele loa, a me kona hoopailua loa ana i na hewa a pau loa; i ka lehulehu o na pomaikai ana e haawi mau mai nei, oiai he poe kupono ole kakou, a me ke aloha ole aku no hoi. Pono ia kakou e noonoo nui no ka make, a no ko kakou ku ana imua o ka Haku mau loa i ka hookolokolo ana. E heluhelu pinepine hoi i ka Baibala, a e pule pinepine, i ike kakou i ke ola, a i hoomaopopo hoi, a i kokuaia mai hoi kakou e hahai pono aku malaila. He mea nui keia e kokua ai ia kakou ma ka malama i ko kakou mau manao me ka hooponopono. A ina e malama pono ia na manao o loko, alaila, e maikai no na hana o waho. Aka, ina e lilo iki na manao i na mea lapuwale, a waiwai

ole paha, alaila, e hoonaukiuki auanei kakou i ke Akua, a e haule aku auanei iloko o na hana hewa e poino ai ko kakou mau uhane iho. Aole hoi oia wale no, aka, e lilo keia hana hewa a kakou i mea alakai aku i na uhane e ae ma na hana hewa, a o lakou ae la ia lakou aku, a pela aku a nui loa. Aole e heluia ka nui o na hua o ka hewa hookahi a ke kanaka e hana'i."

Ma keia mau olelo, ua ike kakou i ke ano nui o ko Opukahaiia paipai pinepine ana i kanaka ma kana mau palapala.

Oia ka pau ana o ka moolelo; he wahi mau manao hope wale no i koe.

MOKUNA VII.

HE MAU MANAO HOPE.

UA ike iho nei kakou i ka moolelo no ua wahi keiki Hawaii nei, mai kona wa i hanau ai iloko o ka pouli o ka wa kahiko, a i kona make ana ma ka aina malamalama. O ka hua makamua ia no Kristo mai loko ae o keia lahui Hawaii. A he mau haawina nui ka kakou e hoomaopopo ai ma keia moolelo. Eia paha ka mua.

Ua hooiaio kela olelo ma ka Baibala ma Roma 9:18, "Nolaila hoi, ua aloha mai oia i kana mea i manao ai, a ua hoopaakiki hoi oia i kana mea i manao ai."

I ka nana wale aku, he mea kupaianaha keia i ko kakou wahi ike kuhihewa, moowini, o ke ao nei. Eia ua wahi lahui holookoa o Hawaii nei, mai a Kahiko laua o Kupulana-kehau, na kupuna mua loa mai, a i ke au ia Kamehameha I., ua waiho mai ke Akua ia lakou a pau, i ka pouli a me ka hoopaakiki ana o ka naau ma ka hoomanakii, iwaepa o

ia mau makahiki he mau haneri paha, he mau tausani paha. Hala wale aku i ka make na ohana Alii he nui loa, a me na hanauna makaainana he nui wale, me ko lakou lohe ole, a ike ole no hoi i ka inoa nui o Iesu Kristo ko kakou Haku, a o ko kakou Hoola. Eia wale mai no i na la mahope mai, ko ke Akua wae ana i keia wahi keiki hookahi i wahi hua mua nona noloko ae o ko Hawaii nei lahuikanaka a pau. Wae no hoi i keia a me kekahi' hoa ona, a haalele ae i ka lahui okoa no kekahi mau makahiki hou aku. No ke aha la keia?, no ke aha la. Aole paha kakou i ike i ka ke Akua mau kumu hana i huna ia iloko o kona manao; aka, eia ka mea i maopopo ia kakou; ua ike ka Mea Hemolele loa i ka pono o kana hana ana iwaena o na mea a kona lima i hana ai, a o ka mea i pono ia ia, ua pono iho la. Ache a kakou wahi mea iki e hoohalahala ai, a e ohumu aku ai ia ia no kona koho ana i kekahi poe no ke ola, a me kona waiho ana ae i kekahi poe no ka make mau. "E pono anei i ka mea i hanaia ke olelo aku i ka mea i hana; no ke aha la oe i hana mai ai ia'u pela?" Rom. 9:20. Ina ua manao ke Akua e hoola

mai i kekahi, na kona lokomaikai wale mai no ia, a ina hoi ua manao oia e waiho i kekahi no ka make mau, na kona mana Hemolele no ia i mea e hoonani aku ai kakou i kona inoa, a e makau aku ai hoi i kona Kana-wai.

Eia hou keia. Ke ike nei kakou ma keia moolelo, aole e hoopaaia ko ke Akua lokomaikai. Aole ma o kekahi lahui kanaka wale no, a o kekahi inoa hoomana paha o keia ao, a me na moo kahuna, a moo Ekalesia paha a kanaka e helu wale nei, aole ma o keia mau mea ko ke Akua haawi ana mai i ke ola no na uhane o kanaka, aka, ma o kona Uhane Hemolele no, nana e alakai, a e hoo-huli ae, a e hoomalamalama, a e hoomaemae i ka uhane hele hewa o ke kanaka. No ka mea, ua ike kakou i ka wa o Opukahaiia i loa ai i ka manao e holo aku i kela aina, aole i hiki mai ka inoa hoomana o na aina Kristiano ma Hawaii nei, aole hoi i loheia maanei ka hoopapaa ana, a me ke kaena ana o kekahi poe no ko lakou mau mookahuna mai a Kristo mai, a mai na luna olelo mai paha. Ua maopopo no hoi, aole ma ka inoa hoomana kahiko o Hawaii nei i loa'i ia

Opukahaiia kona paulele ana i ka inoa o Kristo. Aka, aole paha e kanalua ana^a kekahi o kakou, ua lawe no ke Akua ia ia, me kona ike ole i keia mau mea, a ua alakai aku ia ia iloko o ka malamalama o kona aupuni ma ka lani.

Eia hou nae keia. Oiai he oiaio no, he mea hiki no i ke Akua e hoola ae i kana mea i manao ai, ina no he kanaka pegana paha, a he kanaka no ka lahui malamalama paha, aka hoi, ua koho no oia i hookahi alanui mau e ola ai na uhane o kanaka, oia ka lohe ana i kona Euanelio i hai oiaio ia, E like me ka olelo o ka Baibala ma Roma 10:11-15. No ka mea, ua ike kakou i ko ke Akua koho ana ia Opukahaiia, ua alakai aku oia ia ia a i kahi ona i lohe ai i ka Euanelio o Kristo i haiia e na kauwa o ka Haku. A i kona lohe ana, ua manaoio oia, a ua loa ia ia ke ola mau loa. Ma ka lohe ana, ka manaoio, ke hoolilo ka Uhane Hemolele i ka olelo i mea mana iloko o ka naau o ke kanaka.

EIA HOU KEIA.—E hoomaopopo kakou i ka lokomaikai aloha o ke Akua i kona hoopakele pinepine ana i ke ola o Opukahaiia. I kona wa kamalii, mai make oia iwaena o ke

kaua. Make no hoi na makua, holo oia nei, e waha ana i kona wahi kaikaina uuku ma kona kua. Alualuia laua, houia kahi kaikaina uuku a make i ka pahoa. Malama ola ia nae o Opukahaiia. Ka inoa hoi e make pu lakou a pau i ka luku kaua, eia ka, aole! Oia nei hookahi ka i waeia no ke ola. Ua ike no ke Akua i kana hana iho, ana i manao ai no ua wahi keiki nei, a nolaila hoopaa iho la oia i na lima puni koko, i ole e lawe lakou i kona ola.

Pela hou no mahope iho, i ka lilo hou ana i ke pio, a ua hoomaopopoia oia nei no ka make. Lohe e nae oia nei, o ua o Opukahaiia nei, a kokua mai ke Akua i wahi e puka aku ai oia mailoko aku o ka hale pio. Holo malu aku la oia, a huna ia ia iho ma ka nanehelehele. Aole nae i liuliu oia malaila, a ike maka iho la no i ka pepehiia ana o kona makuakane. I kaiia oia la e ka poe pepehi, a i ke kae o ka paliku, hooleiia i ka pali a make loa. Manao ae la hoi o ua wahi Opukahaiia nei, ua makehewa kona malama ana i kona ola iho; a holo aku la e lele i ua pali nei i moe pu no me kahi makuwahine, ikeia e ua poe enemi nei, hopu ia, a pakele hou kona ola.

Eia hou ua pakele ana o ko ia nei ola e ka lima o ka poe enemi. Ka inoa ua holo mua ko lakou manao e make pu oia nei me kahi makuwahine, eia ka, loli hou ko lakou manao, loa kona ola. Aole anei i maopopo, na ke Akua i malama kupaianaha i kona ola? O ke Akua nae ana i ike ole ai ia manawa.

Pela aku no hoi ko ke Akua malama ana ia ia maluna o ka moku, i kona haalele ana i ke one hanau, a holo aku ma na kai lipolipo o ka moana loa, me kona ike ole i ka aina e hiki aku ai. Alakai pono aku no ke Akua ia ia a hiki i ka aina malamalama, kahi e halawai pu ai oia me ka olelo a ke Akua, ka lamaku o ko ke ao nei. Malaila i loa'i ia ia na makua a me na makamaka aloha. Malaila hoi i loa ai ka waiwai oi aku mamua o keia mau mea a pau; ka ike i ke Akua oiaio, "Ke Akua o Isaaka a me Iakoba." Loa ia ia ka Haku Iesu i Hoola nona. A ua hoolilo ia ia iho i kauwa na ka Haku, me ka manao e hoi mai i kona lahui pono, a e hai i ke aloha lokomaikai o Iesu ia lakou. Make e nae oia, aole i hoi mai. No ke aha la keia? Ka inoa hoi e hoolilo ke Akua ia ia i mea nana e lawe mai i ka malamalama o ke ola i Ha-

waii nei? Ko ke kanakā manao ia. Ua okoa nae ko ke Akua. A maanei kakou e hoomaopopo ai i keia mea.

He manao nui ko ke Akua no ke ola o ka Lahui Hawaii nei, ma kana hana ia Opukahaia. No ka mea, ua lilo ka make ana o Opukahaia, i mea paipai i ka manao o kekahi poe haipule ma Amerika e hoouna mai i ka olelo a ke Akua, i lohe keia lahui, a i loa ia lakou ke ola mau loa ma o Iesu ka Haku.

Oiai e ola ana o Opukahaia, iloko o ka M. H. 1816, i kona wa e noho ana ma ke kula ma Konewale, ua komo iloko o kekahi mau haipule o kela aina ka manao aloha i ka lahui o keia aina. A ua paipai nui no hoi oia ia lakou, me ke kamailio pinepine no kona lahui e noho naaupo ana, me ka loa ole i keia pomaikai ana i ike ai. Ia wa, e noho haumana ana o Binamu ma kekahi kula-nui, (Middlebury College,) a o Kakina hoi, ma kekahi kula-nui e ae, (Yale College.) Ia makahiki ko laua puka ana mai ke kula-nui aku, a komo pu laua iloko o ke kula ao kahunapule ma Anedovera. Ia manawa hoi i hiki mai ai ka leo kahea ia laua, e hele e hai aku i ke Ola i ko Hawaii lahuikanaka. No ka manao




paa nae e noho ma ke kula kahunapule, a pau na makihiki ekolu o ua kula nei e puka ai, nolaila, aole i ae koke ko laua manao. Aka, i ko laua noho ana ma Anedovera, ia mau makahiki, ua loa ka ike ana ia Opukahaia, a me ka launa iki ana me ia. A malaila, ua holo maopopo ko laua manao e ae no i keia leo kahea, a e lawe mai i ka lamaku o ke ola i Hawaii nei. Me ka manao nae e holo pu mai o Opukahaia ma e kokua i kela hana. Aka, make e oia. Aole nae i emi ka manao o ka poe aloha i keia lahui. Ua ike kakou i ka make ana o Opukahaia ma ka malama o Feberuari 1818. Iloko o ka M. H. 1819, puka ae la o Binamu laua o Kakina mai ke kula kahunapule aku, a hoomaopopoia laua i mau Misionari o ke Ola no ko Hawaii nei. Ia manawa, ua hu ke aloha o ko ke Akua poe ma kela aina, a loa koke ae la na hoa kokua pu ia laua ma keia oihana, oia o Wini, o Keiki, (Ruggles,) a me kekahi mau mea e ae. Huipu lakou me ka lakou mau wahine, ua umikumamaha ka nui o lakou. Holo pu mai no hoi o Hopu, Kaumualii, a me Honolii, na hoa o Opukahaia, a i ka M. H. 1820, hiki mai lakou i Hawaii nei.

Oia ke kanu ana o ka anoano o ka Pono ma Hawaii nei. Mai ia manawa mai a hiki i keia la, ua kupu ae kahi anoano a laua, a kumu, a lala, a palahalaha ae, a lilo i malumu no keia lahui a me keia pae aina holo-
 okoa. Ua lilo ia mea uuku i laau nui, (Matt. 13:31, 32,) a ua noho oluolu mai na manu malalo o kona malu; o na manu kamaaina o Hawaii nei, a me na manu lele mai o na aina Haole he nui a lehulehu.

E na moku moana, hauoli oukou,
 Ke ola! ke ola! hookani mau ae,
 Ua pale ka po, ua puka ke ao.
 "Ka Mea Kiekie," "Makamua o na la,"
 Mai ka Lani mai nei ka leo kahea,
 Pio mai la kona nani i ka lua kupapau.

A o oe la e, e Opukahaiia,
 Hauoli auanei, ke ike aku oe,
 O kou aina hanau, ke pua mai nei;
 Opuu ae la na rose, aala mai hoi,
 Nani loa o Sarona, hiehie moana.





Nancy
Hanks
Lincoln
Public
Library